

PEU YE LYANGANISA

 Ni ketile busihu bwa kacenu ngambolo ye kuswani, kamba palo ye kuswani, Mulena ha lata, kulufa makalelo ayona, kuzwa ku Muñoli Mateu 13:24 kuisa fa 30. Mi cwale hape Ni—Ni bata kubala kuzwa fa 36 kuisa fa 40, mwa mizuzu fela ye likani. Cwale Muñoli Mateu, kauhanyo yabu 13, ni kukalela ka timana yabu 24 ya kauhanyo yabu 13 ya Muñoli Mateu. Muteeleze hande kwa palo ya Linzwi. Manzwi aka akona ku palelwa, kono a Hae hana ku palelwa.

Kiha bafa nguli yeñwi, ali, Mubuso wa lihalimu uswana sina mutu yana calile peu yende mwa simu ya hae:

Kono hana sa lobezi, sila sa hae sa taha kuto cala mufuka mwahala buloto, mi sa ikela.

Kono licalo halise limelile, mi litahisize miselo, kiha ku bonahala ni mufuka cwalo.

Kacwalo batanga ba muña ndu bataha batoli ku yena, Muñaka, kikuli nosika cala peu yende mwa simu ya hao? kana mufuka i ungle kai?

Mi ki hali ku bona, Sila kiyena ya ezize cwana. Mi batanga bali ku yena, Kikuli ulata kuli lu ye...luyo ukumula?

Kono yena ali, Batili; kakuli hamuli mu kumule mufuka, muka kumula ni buloto hamoho cwalo.

Mutuhele sibeli sa zona lihulele hamoho kufitela kutulo: mi ka nako ya kutulo Ni ka luma bakutuli, Mukubukanye hamoho mufuka pili, mi mu utame mwa mañata kuli ucisiwe: kono mukubukanyeze buloto mwa shishete.

² Kana mulemuhile, “Mukubukanye mufuka pili, ni ku utama”? Cwale, kakubala se, nekuna ni sesiñwi sesinca senesitile kuna hane Nili fa halimu a Malundu a Catalina busihu bobuñwi, mwa litapelo. Mi cwale Na hupula, kikai ko Ni ka fumana linzwi le Ni ka itusisa kase Ni bata ku ambola fateni busihu bo?

³ Mi Naya nayo fumana linzwi la *kulyanganisa*, kacwalo Na nga buka ya li taluso za manzwi ni kubata seo linzwi lelili *kulyanganisa* litalusa. Mi litalusa kuli “kucala twaniso,” kamba—kamba, “kuba ya lwanisa,” sina Webster hali, “kucala twaniso, sika sesi shutana,” kamba, “kuba ya shutani kuse sibile teñi kale.” Kacwalo Na hupula, palo busihu bo, Ni ka ibiza: *Peu Ye Lyanganisa*. Mi nisepa kuli Mulena uka fuyola Linzwi la Hae cwale halunze lu Li atumela.

⁴ Mi hape lwa ziba Na tolokile, mwa timana yabu 36 ni—ni kuisa fa 43, mane kuli peu ye nei hulile. Mi cwale halunze luli kuyona, ha lubaleñi fela yani hape, timana yabu 36 cwale kuisa fa 43.

Mi cwale Jesu hanasa lukuluzi sicaba kuli siye, Kiha yo kena mwa ndu: mi balutiwa ba hae ba taha ku yena, mi bali, Ulutaluseze nguli ya mufuka wa simu.

Mi ki Ha alaba ni kuba bulelela kuli, Ya calile peu yende ki Mwana mutu;

Mi simu ki lifasi; mi peu yende ki bana ba mubuso; kono mufuka ki bana ba ya maswe;

Sila ya li cezi ki diabulosi; kutulo ki mafelelezo a lifasi; mi bakutuli ki mangeloi.

Mi sina mufuka hau kubukanyiwa ni kuciswa mwa mulilo; kimo ku kabela ni kufela kwa lifasi.

Mwana mutu uka luma mangeloi ahae, mi uka kubukanya zemwa mubuso wa hae zeo kaufela ze lwanisa, ni bani babaeza ze maswe;

Mi uka ba nepela mwa mulilo, ondo ya mulilo: mi kimo kuna ni lililo, kamba kulila ni likweca meno.

Mi ba bakenile baka benya sina lizazi mwa mubuso wa Ndata bona. Yana ni lizebe... a utwe.

⁵ Yani ki Jesu yafa toloko ya nguli, Yena kasibili, kabakaleo lwa ziba seo toloko italusa. Mi cwale halunze lu atumela se, kaza kucala kwa peu ni—ni ku kutula, cwale Wa i toloka. Mi cwale Ni lumela kuli Jesu na bulela nguli ye mwa lizazi la Hae, kono na talusa mo ku kabela kwa maungulo a lifasi, kamba, mafelelezo a nako, yeli *ona lizazi* le. Mi Ni lumela kuli *ona taba yelikani* ye busihu bo ya zamaelela ka hola ye lupila ku yona, kakuli Jesu nabulezi hande fa kuli “*kukopana ikaba kwa mafelelezo a lifasi*,” fani kona fokukabela mafelelezo; ku kubukanya kwa buloto, mi hape ni ku kubukanyiwa kwa mufuka ni kuli cisa, ni ku kenya buloto mwa Mubuso. Mi Na lumela neli ka nzila ye.

⁶ Mi Liñolo leliñwi li niisa kwa kulumela ka nzila ye, Ni li ñozi ona fa, ki Mateu 24:24, fo libulezi kuli, ku bulela kaza—kaza sipula, peu ye lyanganisa. Jesu nabulezi kuli sibeli sa zona likaba bukaufi hahulu kufitela li puma nibona Babaketilwe haiba kinto ye konahala. Ku bonahala ka kuswana luli.

⁷ Sibaka sesiñwi mwa Mañolo ko kuñozwi kuli, pula iinelanga kuba balukile ni ba basika luka.

⁸ Ni hupula zibo yaka yapili ya kutaha mwahala batu ba Pentekota. Nenili kwa Mishawaka, Indiana. Mi Ne nili kwa mukopano omutuna, muyaho olikanina sina wo, ko ba Mutulo ni ba kwa Mboela nebatile hamoho. Kakuli mwa mazazi ani, bakeñisa ketululo, neba na ni kuputehela kwa halimu kwani.

Nebali likwata zepeli zetuna za balumeli ba Pentekota. Ne nisika utwa kale kamba kukopana ni bona. Nako yapili yeo Ni kile na utwa za kubulela ka malimi. Mi kwa mafelelezo a sebelezo, a mukopano... Na nisi alimuñwi mwahala bona, Nenili fela mukutazi yomunyinyani wa Baptist, Ne ni inezi kwahule kwa mulaho. Mi Ni hupula nako yapili hani kile Na utwa mutu abulela ka malimi, Na mane nenisa zibi seo—seo nesi talusa. Mi cwale baana bababeli ba, sihulu, neba inezi kwa pata, yomuñwi na bulela ka malimi mi yomuñwi na toloka zeo yomuñwi na bulela. Kulukile, kona ha Neni kalile kubala Bibele yaka katata mo Ne ni konela, kwani cwale, ni kufumana kuli zani neli za Mañolo. Sani kona seo Mañolo, Moya o Kenile uka eza.

⁹ Kulukile, mwendi lizazi lililiñwi hasamulaho wa fani... Busihu bwani pilu yaka nei katazehile hahulu. Ne ni lobezi mwa simu ya mbonyi. Neni sina masheleñi amañata akuli nibe—nibe ni mumbeta, kacwalo Neni na ni fela masheleñi aku nifitisa fela kwa hae, mi Neni nani fela mañende, anainzi mazazi amabeli, kamba mabanzi, neli ona, mi neli za mukushuko waka. Mi Neni amuhezwi kuli nice ni bona, kono Neni sina masheleñi akuli nikoleke mwateni. Ka mazazi ani, mwani neli mwa lukupwe ka, 1933, kacwalo neli—neli linako zetata luli. Mi kacwalo Nahupula kuli, “Kulukile, Nika... Hanilati kuca ni bona, kono Ni bata kuziba seba nani. Bana ni sika se Ni sina.”

¹⁰ Kacwalo kakusasana wani Neni sweli... neba ni kupile, “Bakutazi kaufela mutahe kwa pata mi muitibahaze ilimina, bao muli bona, ko muzwelela.”

¹¹ Kulukile, Na—Na se nili, “William Branham, mubuleli, Jeffersonville,” seni ina. Kulukile, ka nako yani Ne nili mukutazi yomunyinyani kakufitisisa kwa pata. Mi kale litatama bani bizeza kwa katala kuyo kutaza. Mi cwale Ni mano bulela, kiñi, nelu nani nako yende, mi se Ni kala kukopana ni batu baba shutana kunimema kwa likeleke zabona. Mi kasamulaho bamano...

¹² Kasamulaho wa sani, kiñi, Na hupula, “Kambe Ne nika fumana fela kone ku inzi baana bababeli bani bene babulela ka malimi mi yomuñwi inza toloka!” Sani nesinze si bila mwa pilu yaka, Neni sibata hahulu. Kulukile, sina ha Ni mibilelezi kwa makalelo, mpo ye likani yemu hapeleza. Mwa ziba, limpo ni lipizo halitokwi ku libakela, muna ni zona mwa bupilo bwa mina kaufela, mwabona, mu pepwa ni zona, haiba ki limpo za Mulimu. Kacwalo Na kamita, kukalela kwa bwanana bwa bu mbututu, nelinze lini ezahalelanga, batu ba bani ziba ka bupilo bwaka kaufela, baziba kuli yeo ki niti. Kulukile, kabe Ne nika hupula... Ne nisa zibi kuli neli sikamañi sani ka nako yani, ni kusibiza kuli ki pono, Ne nisa zibi fela kuli neli sikamañi. Kono Na hupula, “Kambe Ne nika kona fela ku ambola nibona!” Kulukile, mi moyo onoli mwa muyaho neu utwahala sina Moya wa Mulimu.

¹³ Kacwalo Na—Na tofita ku alimuñwi wa bona, mi Na muba za lipuzo nyana, mi yena nali Mukreste wa niti. Nekusina ku kakanya ka yena, muuna yani neli mulumeli wa niti. Mi muuna ya tatama, fani hane Ni bulezi kuyena, haiba Ni kile na kopana ni muipi, yani nali alimuñwi wa bona. Muuna yani kaniti... Musala hae neli wa milili ye mifubelu, mi nana ni bana ka... bana bababeli ka musali wa milili ye minsu. Mi Na hupula, “Kulukile, cwale kiñi? Kise fa, Ni—Ni lyangani. Na ni mutu wa litaba za makalelo; ilukela kuba Linzwi, kusicwalo hali sika luka. Mi ki wo fa Moya, yomuñwi na lumile, kuya ka ze Ni ziba, za luli; mi yomuñwi nasi yomunde ni hanyinyani; mi Moya unzo wela kubona bababeli. Cwale, zani likona kuba cwani?” Ne, nesi ni lyanganisize.

¹⁴ Lilimo zepeli hasamulaho, Ne ni sweli kulapela mwa liñope kone Ni yanga kuyo lapela. Neku nani maluli mwa liñope, mi musihali omuñwi na zwela fande, na beya Bibele yaka fa kota, mi moya wa I kwalula mwa Maheberu, kauhanyo yabu 6. Yene ibulela kuli, kuli mwa mazazi a maungulo, mone ku kabela hane luka wa kuzwa kwa Niti ni ku kutela hape kwa kubaka, nekusike kwaba sitabelo sa sibi, nikuli miutwa ni liseto, kize neli bukaufi ni kuhanawa, zeo mafelelezo azona ki ku cisiwa; kono pula i tahanga fa lifasi, kamita, kuli iselaele, kuli imelise lika; kono miutwa ni liseto lika hanawa, kono haili buloto buka kubukanyiwa. Mi Na hupula, “Kulukile, neli moya fela hape onotilo i kwalula.” Kulukile, Ne ni beile fela Bibelefafasi hape. Mi Na hupula, “Kulukile, cwale Ni ka...” Mi ona fani hape sekutaha moya kuto I kwalula. Sani nesi ezahalile halalu. Mi Na hupula, “Kulukile, cwale, sani kise sinca.”

¹⁵ Mi he hane Ni nze nihula, mi Na hupula, “Mulena, kiñi ha No ka kwalula Bibele yani kuli ni bale sani, Na... hane Ni ilofita fani, fo kuli ‘miutwa ni liseto, zeli bukaufi ni kuhanawa, ze mafelelezo azona ki ku cisiwa?’” Na hupula, “Kiñi, ha No ka kwalula sani kuna?” Mi ninze ni talimile cwalo mwa buse... .

¹⁶ Cwale, lipono za niti ze liitahelanga fela kusina ku hapeleza munahano kaufela. Yani ki Mulimu fela. Mwabona? Na talima mi Na tobona lifasi lisweli kupikuluha kwa pata kuna, mi Ne niboni kuli neli sikami cwalo. Nekuna ni muuna yana apezi ze sweu, naya inza cala buloto. Mi hana sa ilo potoloha lifasi; mwa mulaho kwa taha muuna, yana bonahala ku sabisa, na apezi ze nsu, mi nasweli ku hasaka lipeu za mufuka kaufela kona. Sibeli sa zona za mela hamoho. Mi hane limelile, neli na ni linyolwa sibeli sa zona, kakuli pula nei tokwahala. Mi yeñwi ni yeñwi neibonahala inge kuli ya lapela, ni toho ya yona inamezi fafasi, “Mulena, akulume pula, akulume pula.” Mi se ku taha malu amatuna, mi pula ya nela kuzona zepeli cwalo. Hane inelile, buloto bobu nyinyani bwa tulela mwa halimu ni kukala kubulela kuli, “Ku lumbwe Mulena! Ku lumbwe Mulena!” Mi ni mufuka

wo munyinyani wa tulela mwa halimu ka nako yeswana luli, ni kuli, "Ku lumbwe Mulena! Ku lumbwe Mulena!"

¹⁷ Mi cwale pono nei tolokilwe. Pula inelanga kuba ba balukile ni baba sika luka. Moya o swana wakona ku suluha mwa mukopano, mi mutu kaufela wa nyakalala ku ona: baipi, Bakreste, ni bao kaufela. Kaniti faa. Kono ki sikamañi? Ka miselo yabona ba zibahala. Mwabona? Yani kona fela nzila yeo likona kuzibelwa ka yona.

¹⁸ Mi mwa bona sani cwale, kakuli limela zamwa naheñi, kamba mufuka wa mwa naheñi ni lipeu li likanyisanga limela za niti, lipeu zamwa hae, lifa kaufi luli kuli mane likapuma nihaiba Babaketilwe. Ni sepa lupila mwa nako yateñi, ibo lika ze lilukela ku kutazwa ni ku ambolwa fateni.

¹⁹ Mulemuhe mwa timana ya 41, zepeli cwalo hape li inzi bukaufi luli, bukaufi luli mwa mazazi a maungulo kufitela Ha sike a...Haana ku itinga fa keleke yeñwi kuli ali kauhanye, kuli, ba Methodist kamba ba Baptist, kamba ba Pentekota, kuli bali kauhanye. Na ize, "Uluma mangeloi a Hae kuli aba kauhanye." Lingeloi la taha kutotisa kauhano, ketululo mwahala ba bande ni baba maswe. Mi hakuna yakona kueza cwalo kono ki Lingeloi la Mulena. Ki Lona lelika ziba ya lukile ni ya fosahalile. Mulimu naize Uka luma mangeloi a Hae ka linako za mafelelezo. Isiñi mangeloi kutaha ka kushetumuka cwalo *kwanu*, kono mangeloi kwa nako ya mafelelezo, mi aka kopanya hamoho. Lwa ziba kuli kwa ki kutaha kwa nako ya kutulo cwale. Cwale, *lingeloi* kaniti litolokwa kuli ki "mulumiwa." Mi lubona kuli kuna ni mangeloi a supa a linako za likeleke ze supa, mi cwale... batili, kufita mwa linako za likeleke.

²⁰ Mulemuhe bao Na bulezi kuli kona bacali, mi hape ni seo peu neli sona. Alimuñwi, mucali nali Yena, yena Mwana Mulimu, Yana ile inza cala Peu. Mi sila nesitaha mwa mulaho wa Hae, ya nali yena diabulosi, mi acala peu ye lyanganisa, mwa mulaho wa kucaliwa kwa Peu yende. Cwale, balikani, sani sibile siezahala mwa lusika ni lusika haisamba luba ni lifasi. Niti. Kuzwa koo kwa simuluhu, neku kalile ka sika sesiswana.

²¹ Cwale Na ize, "Peu ya Mulimu, ona Linzwi la Mulimu." Jesu naize, mwa sibaka sesiñwi, kuli "Linzwi ki Peu." Mi peu kaufela ika tahisa za mufuta wa yona. Mi cwale haiba Mukreste, bana ba Mulimu, bana ba Mubuso bafetuhile Peu ya Mulimu, konakuli balukela kuba Linzwi la Mulimu, Linzwi la Mulimu li bonahalile mwa lusika lo bapila kulona, ka Peu yene sepisizwe ya lusika lwani. Mulimu nafile Linzwi la Hae kwa makalelo, mi lusika ni lusika lubile ni Peu ya lona, nako ya yona, lisepiso za yona.

²² Cwale, fani Nuwe hana tile, mi nali Peu ya Mulimu, ona Linzwi la Mulimu la lusika lwani.

²³ Fani Mushe hanatile, nasika taha ni liñusa la Nuwe, nelisike la beleka, kakuli nali yena Peu ya Mulimu ka nako yani.

²⁴ Mi cwale Kreste hanatile, Nasika taha mwa lusika lwa Nuwe kamba lwa Mushe; neli nako ya Hae, kuli mwalyanjo aitwale nikuli apepe Mwana mushimani, mi Ukaba yena Mesia.

²⁵ Cwale, luse lu pilile mwa lusika lwa Luther, lusika lwa Wesley (lusika lwaba Methodist), mwahala masika kaufela, ni mwa lusika lwa ba Pentekota, mi lusika kaufela lufilwe sepiso ya Linzwi. Mi batu ba lusika lwani, ona ponahazo ya Linzwi yani, kona Peu ya lusika lwani, kuya kasa na bulezzi Jesu ona mo, “Bona ki bana ba Mubuso.” Yani ki niti. Ponahazo ya Moya o Kenile ku belekela mwa bana ba Hae kiyona Peu yani ya Mubuso ka nako yani.

²⁶ Mulemuhe, mufuka neli ona, yena sila, Satani, yana cezi sinyeho, kamba ona—kamba ona kulyanganisa, nali yena ya nabile ni mulatu wa kueza taba ye. Satani na cezi peu ya hae kuzwa kwa simuluho, fani Mulimu hana beile kutulo ya Hae ya pili ya batu fa lifasi. Adama, ka niti, na sa zibile kale kuli nekuna ni—ni zibo ya niti, ni ya bunde ni bumaswe, mi yena nasika fita kale kusani.

²⁷ Kono lufumana kuli, Mulimu nafile bana ba Hae Linzwi la Hae ka Sileleza ya bona. Bona... Haluna Silelezo yeñwi kwanda Linzwi la Mulimu. Yani kona Silelezo yaluna. Hakuna ma bomba, hakuna masabelo, hakuna sibaka sa mapumulelo, hakuna bo Arizona kamba bo California, kamba seo kaufela sili sona; kuna ni fela Silelezo iliñwi yelunani, mi yani ki Linzwi. Mi Linzwi laezwa nama mi lato yaha ku luna, yeli Kreste Jesu, Kiyena fela Silelezo yaluna. Kuba ku Yena, lu iketile.

²⁸ Mane nihaiba sibi ha si balelwí mulumeli. Kana mwa ziba cwalo? Ya pepilwe ki Mulimu, ha ezi sibi, hakoni kueza sibi. Mwabona? Mane habalelwí cwalo. Kiñi, Davida naize, “Ufilwe mbuyoti mutu yo Mulimu habaleli sibi.” Hamuli ku Kreste, hamuna takazo ya sibi. “Mulapeli, ha sa swalezwi, ha sa na lizwalo la sibi,” hamusa si lakaza. Cwale, kwa lifasi, wakona kuba mueza libi; kono, ku Mulimu, ha ucwalo, kakuli uina ku Kreste. Kana ukona kuba cwani mueza libi kanti uinzi ku Ya sina sibi, mi Mulimu ubona Yena Yo uli kuyena?

²⁹ Cwale nako ya kutulo ye. Kwa simuluho, fani Mulimu hana cezi Peu ya Hae fa lifasi ni ku ibeya mwa lipilu za bana ba Hae, lubasi lwa Hae, ku buluka Linzwi lani, yani neli yona silelezo yabona fela, mubuluke Linzwi leo! Mi kiha kutaha sila mi apunya lukwakwa, ka kucala peu ye lyanganisa, kushutana ni Linzwi la Mulimu. Haiba kwani neli kulyanganisa kwa simuluho, kusali cwalo. Sika kaufela sesika ekeza sika kaufela kwa Linzwi la Mulimu, isali peu ye lyanganisa! Hanina taba ko si zwelela, haiba sizwa kwa katengo, haiba sizwa kwa batu ba masole, haiba sizwa kwa mibuso ya lipolitiki, sika kaufela sesi shutana ni Lizwi la Mulimu, ki peu ye lyanganisa.

³⁰ Mi muuna ha yema ni kubulela kuli ki mukutazi wa Evangelii, mi ubulela kuli “mazazi a limakazo afelile,” yani ki peu ye lyanganisa. Mutu ha yema ni kubulela kuli ki mukutazi, mulisana wa keleke kamba kokuñwi, mi halumeli kuli Jesu Kreste kiya swana mwa litaba kaufela (kwanda mubili wa butu), yaswana maabani, kacenu, ni kuyakuile, yani ki peu ye lyanganisa. Ha bulela kuli “limakazo ni linako zaba apositola lifelile,” yani ki peu ye lyanganisa. Haba bulela kuli, “Hakuna sika sakuli foliso ya Bumulimu,” yeo ki peu ye lyanganisa. Mi lifasi litezhi yona. Ya ekezeha ni ku pukutisa buloto.

³¹ Lu lemuha kuli mucali wapili wa peu ye lyanganisa na bizwa kuli “ki diabolosi,” mi lwa ziba nali yena, mwa Genese 1. Cwale lufumana cwana, mi nimo mwa—mwa Buka ya Mateu, kauhanyo yabu 13, Jesu usa biza kulyangana kaufela koku lwanisa Linzwi la Hae kuli “ki diabolosi.” Mi 1956 ye, sika kaufela sesi cala kulyangana, ka kushutana kwa Linzwi leli ñozwi la Mulimu, kamba kubeya toloko ye patilwe ku Lona, ki peu ye lyanganisa. Mulimu hana ku i buluka. Ha koni. Halina ku kopana. Kaniti halina kukopana. Kuswana sina peu ya masitete; halina ku kopana ni lika lisili kaufela, hamukoni ku li zwaka, silukela kuba sika sa luli. Peu ye lyanganisa!

³² Cwale lwa fumana, fani Mulimu hana cezi Peu ya Hae mwa simu ya Edeni, lufumana kuli neitahisize Abele. Kono cwale Satani hana tilo cala peu ya hae ye lyanganisa, nei tisize Kaine. Yeñwi neitahisize ya lukile; yeñwi neitahisize ya si ka luka. Kakuli Eva na telelize kwa linzwi leli lyanganisa, kushutana ni Linzwi la Mulimu, mi kiha kukala kupikuluha kwa sibi ona kwani, mi sibile si pikuluha kukalela ona kwani. Mi haluna ku si kumula kaufela sona kufitela mangeloi atahe ato kauhanya taba yateñi, ni Mulimu angele bana ba Hae mwa Mubuso, mi mufuka ukaciswa. Mulemuhe likota zepeli zani.

³³ Kambe ne lukaba ni nako yeñata fa tuto ye, kono fela kaku nata likalulo zetuna, ili kuli lukone kukena kuza ku lapelela bakuli ka mizuzu ye likani.

³⁴ Mulemuhe, lipeu zabona neli hulela hamoho ona cwalo fela mwana bulelezi Mulimu fa hape mwa kauhanyo yabu 13, ya taba yaluna busihu bo, ya Mateu, “Mulituhele sibeli sa zona lihule hamoho.” Cwale, Kaine naille kwa naha ya Node, ayo ipumanela musali, mi anyala; mi Abele na bulailwe, mi Mulimu azusa Seta kuli ange sibaka sa hae. Mi masika akala ku ata, mwahala bunde ni bumaswe. Cwale, lu lemuha kuli neba kopani, yeñwi ni yeñwi ya zona, nako ni nako, mi Mulimu nana ni ku... Nelibile ze maswe hahulu kufitela Mulimu ato li sinya.

³⁵ Kono neli tilohula kufitela sibeli sa lipeu zani, peu ye lyanganisa ni Peu ya Mulimu, neli yemisize litoho za zona za luli, mi sani sato felela ku Judasi Isikariota ni Jesu Kreste. Kakuli, Nali Peu ya Mulimu, Nali wa makalelo a pupo ya

Mulimu, Nasi nto isili kwanda Mulimu. Mi Judasi Isikariota na pepilwe ali mwana wa sinyeho, nazwile kwa lihele, ukutezi kwa lihele. Jesu Kreste nali Mwana Mulimu, Linzwi la Mulimu leli iponahaza. Judasi Isikariota, mwa kulyanganisa kwa hae, nali peu ya diabulosi, ataha mwa lifasi, mi ka bupumi; sina fela mwana inezi kwa simuluhu, Kaine, ndatahe wa sapili.

³⁶ Judasi yena na bapalisa fela keleke. Yena nasi ya sephala luli. Kaniti mane nasina tumelo; kambe nasika beteka Jesu. Kono, mwabona, na cezi peu yani ye lyanganisa. Nahupula kuli uka eza silikani ni lifasi, milimu, mi hape abe ni silikani ni Jesu, kono nese kufelile kale nako yakuli aeze sesiñwi ka sona. Fani hola ye shwile haneitile, hana ezize taba ye maswe ye, nasilile mufunda wa ku kauhana kuya kwa pata ni kukuta mwa mulaho. Nana ni ku zwelapili ka nzila yana ile kayona, kakuba mupumi. Na cezi peu ye lyanganisa, alikile kufumana sango ni likopano zetuna zani za zazi lani, za Bafalisi ni Basaduki. Mi ahupula kuli naka ipumanela kapene nyana, mi abe ya zibahala mwahala sicaba. Haiba sani ha si ezi kuli batu babañata bakene mwa kulyangana kwani, kulika ku fumana sango ni mutu! Halubeni mwa sango ni Mulimu, isiñi ni mutu. Kono sani kona sana ezize Judasi fani kulyangana kwa akuto felela ku yena.

³⁷ Mi luziba kuli Jesu nali Linzwi, Muñoli Joani 1, naize, "Kwa simuluhu nekuna ni Linzwi, mi Linzwi nali ku Mulimu, mi Linzwi neli Mulimu. Mi Linzwi aezwa nama mi atoyaha onafa kuluna." Kasamulaho, Linzwi ki Peu, mi Peu ya fetuha nama ni ku to yaha ku luna.

³⁸ Haiba Judasi nali peu ya sila ni kulyangana, niyena hape natile mwa nama ni kuto yaha ni luna ku mutu ya bizwa Judasi Isikariota. Yena mane nasina tumelo, ya niti luli. Na nani sana *hupula* kuli kona tumelo. Kuna ni taba yakuli kuba ni tumelo; ni tumelo ya ku likanyisa.

³⁹ Mi tumelo ya niti ku Mulimu ika lumela ku Mulimu, mi Mulimu ki Linzwi, halina ku ekeza sesiñwi ku Lona. Bibele i lu bulelela kuli haluka ekeza linzwi lililiñwi, kamba kuzusa Linzwi lililiñwi kuyona, siemba saluna sika zuswa mwa Buka ya Bupilo, Sinulo 22:18, kauhanyo ya mafelelezo ye kwala.

⁴⁰ Mwa simuluhu yapili, Buka yapili ya Bibele, Mulimu naba bulelezi kuli basike baloba leliñwi la Linzwi Lani, "Linzwi kaufela lilukela ku bulukwa," balukela kupila ka Linzwi lani. Jesu, mwahala Buka, natilo bulela cwalo mwa lusika lwa Hae, mi ali, "Mutu hana kupila ka buhobe fela, kono ka Linzwi kaufela le—le lizwa mwa mulomo wa Mulimu." Mi ni mwa lusika lwa kukwala lwa Sinulo, na lu bulelezi isali sapili, kuli "Yo kaufela yaka zusa Linzwi lililiñwi mwa Buka, kamba ku ekeza linzwi lililiñwi ku Lona, siemba sa hae sika zuswa mwa Buka ya Bupilo."

⁴¹ Kacwalo hakuna sesi lukela kuba muluti, ilukela kuba la niti, Linzwi leli sika umelwa la Mulimu! Bani ki bana ba Mulimu baba shimaní, bana baba sizana ba Mulimu, baba sika pepwa ka kulata kwa mutu, kamba ka ku swalana mwa mazoho, kamba mifuta yemiñwi ya kolobezo; kono ki baba pepilwe ka Moya wa Mulimu, ka Moya o Kenile, mi Linzwi li iponahaza Ililoná ka bona. Yani kona Peu ya niti ya Mulimu!

⁴² Sila wa ikenyanga mwa keleke mi ufetuha ya itutile hahulu za tumelo ka mukwa wa litumelo kamba zeñwi. Kono zani haki zona . . . Zani ki kulyangana, sika kaufela sesi lwanisa kusinya busepahali bwa Linzwi la Niti la Mulimu.

⁴³ Mi kana luziba cwani? Luli, “Kulukile, bona, una ni tukelo ya lu Li toloka?” Batili, sha! Hakuna mutu yana ni tukelo ya kutoloka Linzwi la Mulimu. Yena ki Mutoloki Iliyena. Yena wa sepisanga, mi Wa eza, yani kona toloko yateñi. Fani Hana Li sepisize, kasamulaho Wa Li taleleza, yani kona toloko ya Teni. Sika kaufela sesi shutana ni Linzwi la Mulimu ki kulyangana! Kaniti!

⁴⁴ Cwale, sina ha Ni bulezí, Judasi nasina tumelo yaniti. Nana ni tumelo ya malikanyiso. Nana ni—ni tumelo yana hupula kayona kuli yani neli Mwana Mulimu, kono nasazibi kuli yani neli Mwana Mulimu. Kambe nasike aeza cwalo. Mi mutu yaka keshebisa ka Linzwi la Mulimu le kuba Niti, una ni tumelo ya kuipangela. Mutanga Mulimu wa niti uka swalelela kwa Linzwi lani.

⁴⁵ Masihu amanyinyani afitile, mukutazi yomuñwi, wakwa Arizona, wa sikolo, sesituna sesi zibahala hahulu mwa muleneñi wo, natile kuna mi sali, “Ni—Ni bata kuku sikuluha hande fa taba iliñwi” (Na li . . .) “haiba una ni nako.”

Se nili, “Ye kiyona nako yende ye Ni ziba. Aku zwelepili.”

⁴⁶ Mi kacwalo ataha, mi ali, “Bo. Branham, musweli kulika . . . Ni lumela kuli wa sepahala mi una ni niti, kono usweli kulika ku zibahalisa kwa lifasi Tuto ya ba apositola.” Mi ali, “Nako ya baapositola neifelile ni baapositola.”

⁴⁷ Se nili, “Taba yapili ye Ni tabela ku kubuza, muzwale, kana wa lumela kuli Linzwi la Mulimu kaufela li susumelizwe?”

Ki hali, “Eeni, sha, Na lumela kaniti.”

⁴⁸ Se nili, “Cwale, unibonise mwa Linzwi koo nako ya baapositola neifelile? Cwale, aku nibonise ko iinzi, Nika lumela ni wena.” Mi se Nili, “Muñoli wa buapositola, yena yana nani linotolo za Mubuso, ka lizazi la Pentekota fani lusika lwa baapositola haluto kaliswa, ne baize, ‘Bana bahesu ni mizwale, ki sikamañi seluka eza kuli lupiliswe?’ Ki hali, ‘Mubake, mutu ni mutu wa mina, mi mukolobezwe ka Libizo la Jesu Kreste, ka swalelo ya libi, mi muka amuhela mpo ya Moya o Kenile, kakuli sepiro i filwe mina ni kwa bana ba mina, ni ku babali

kwahule, mane ni bao Mulena Mulimu wa luna ukabiza.’ Cwale, kana Linzwi likona ku ikananisa cwani Ililona?”

Muuna yani sali, “Na njanja salami sesituna busihu bwa bo.”

Se nili, “Na sepa cwalo, nina.” Mwabona?

⁴⁹ Cwale mu ni bulelele, kikuli Mulimu usabiza? Haiba Mulimu usabiza, konakuli nako yaba apositola isaliteni. Kaniti! Mane ni babañata be Mulena Mulimu wa luna ukabiza, kamita wabiza, kamita ukana abiza, babañata bao Aka biza, ikazwelapili kuba nako yaba apositola, kakuli Jesu Kreste waswana maabani, kacenu, ni kuyakuile.

⁵⁰ Cwale, lufumana kuli kacenu kulyangana kwa kuse kucezwi mwa linako kaufela. Kambe kwa konahala kuli lukene kuzona mwa mizuzu ye lishumi kamba lishumi ni ye ketalizoho, Ne nikaeza cwalo, kono hamukoni. Kushetumuka cwalo mwa masika... Kaufela luna, buñata bwa luna lwa balanga Bibebe. Mi cwale sina Jesu hanatile, mi Na fumani kulyangana kwani, ka kushutana. Nali Linzwi lene li iponahaza, Nali toloko ya Linzwi la Mulimu, kakuli Na ize, “Mubale Mañolo, kakuli ku Ona muhupula kuli muna ni Bupilo Bobusafeli, mi ki ona apaka kaza Ka.” Kifo he cwale. Yena—Yena nali toloko ya Linzwi. Mi mwana Mulimu kaufela ya pepilwe sinca wa muuna kamba wa musali wa lusika lo ki toloko ya Linzwi. Mina mu mañolo añozwi, abaliwa ki batu kamukana. Eeni.

⁵¹ Mulemuhe, Na ize, “Ba Ni lapela ka mbango, baluta Lituto ze lyangani. Ba Ni lapela ka mbango, ku luta Lituto zaku lyangana, lituto za mutu, litaelo za batu, baluta zani kuba Linzwi la Mulimu, kanti halina za kueza ni Linzwi la Mulimu.”

⁵² Mutualime, lusika kaufela lutisize limela ze cwalo, lusika kaufela lu ezize cwalo, mi lwa luna haluna buinyazo. Luna ni lika ze swana, mi lusika lo lutuna lwa teni kufita masika kaufela habeiwa hamoho, kakuli kwa ki kufela kwa makande a kale. Kwa ki kulyangana kokutuna ko kukile kwaba mwa lifasi, ko ku liteni fa lifasi mubu kacenu. Kulyangana mwa masika amañwi neku ba hohezi kwahule kuzwa ku Mulimu wa niti yapila, kuya kwa milimu. Kacenu, Jesu naize mwa Mateu 24:24 kuli ikaba bukaufi luli, uka puma nibona ba Baketilwe haiba kinto ye konahala. Muamble kaza kulyanganisa! Oh, ki butali bo butuna. Satani umwahala batu, mi ki muituti wa luli, Muituti waza Bumulimu ya cwalo, wakona ku luta Linzwi lani ka kubata kuswana mwa ku petahala. Jesu nabulezi cwalo. Kono mu mutualime fela, kukaba fokuñwi. Naize, “Kulukile, cwale, sani nesi sa ze.” Oh, eeni, ki sa zona, nisona, mwabona, kakuli Mulimu naize neili ona cwalo.

⁵³ Mutualime sene i ezize. Ona kulyangana ko kuswana kwani neku tisize buhali bwa Mulimu mwa mazazi a Nuwe, fani Mulimu hana lumile mupolofita wa Hae sina mulilo wa lubya, na bizize kubaka kwa batu, mi kulyangana kwa tiba. Mi kisikamañi

sana ezize Satani? Ataha niyena mwa mulaho, ku Kama, mi akala kucala hape. Yeo ki niti yetezi.

⁵⁴ Hasamulaho kwa taha Mushe, mupolofita yomutuna, kuli atise bana ba Isilaele kubazwisa mwa lihalaua. Kiñi sene si ezahalile? Mushe, mupolofita yomutuna wa Mulimu, inza batiseza Niti ye tezi, Niti ye nyakisizwe. Na katani Mulimu. Mulimu na nyakisize kuli na kopani ni Yena. Kamo batu bani kwa mulaho kwani, baprisita bani, mi nebana ni bulapeli bwa bona, mikiti yabona, masheleñi abona ni lika kaufela, kono Mushe nayemi sina ponahazo ya Linzwi. Musike mwa libala seo! Mushe nali toloko ya Mulimu ya sepiyo ya Hae. Nabulezi kuli uka eza cwalo; nabile toloko ya Mulimu.

⁵⁵ Kisikamañi sene si ezahalile? Keleke kona hane isazo kala fela kuzwa mwa Egepita, ka mautu ayona mwa mazazi alikani, mi kisikamañi sene si ezahalile? Satani ataha cwalo ni buhata bwa hae ku mutu, Kaine wa bubeli, ya nali Balami, mi kiha cala kulyangana mwahala bona. Lwa ziba kuli yeo ki niti. Kuli Balami, ona tuto ya Balami, yakuli “kaufela luna lwa swana, lu sebeleza Mulimu yaswana yo musebeleza nimina,” kaniti, na lukile, kakuli na file sitabelo seo Mulimu nafile; li totolo ze supa, lipoho ze supa fa maaletare asupa, ni kulapela ku Mulimu yaswana ona cwalo fela ka ku petahala sina mwana ezelize Mushe mwa lihalaua, ka mukwa fela oswana. Kono ne ba sa swani! Ku lu bonisa zene sa taha. Nekuna ni fani, hape, Kaine na bonahalezi ku—ku mutu ya nali Balami. Mi neku na ni Mulimu yana bonahalezi ku mutu ya nali Mushe, kutoloka Manzwi a Hae kufitela ku mutu, ku itibahaza Iliyena, sepiyo ya Hae, kufitela ku mutu. Mi kulyanganisa kwa zuha.

⁵⁶ Ki mone kubezi ni mwa linako za Judasi, natile ni kulyanganisa kwa hae.

⁵⁷ Mi, muhupule, sibi se seo batu bani neba lumela, kuli “kaufela luna lwa swana, lu lapela Mulimu ya swana, kaufela luna lulukela kuba ba keleke yeswana, lulukela kuba batu baba swana,” sibi sani nesi sika swalelwa kwa ma Isilaele! Jesu naize, Yena muñi, “Kaufela bona bashwile!”

⁵⁸ Neba yundile, kaufela bona kwanda babalalu ba bona. Bani neli bona bene ba swalelezi ni ku lumela sepiyo. Fani baba fokola hane baize, “Ha lukoni kuyola naha, mi ku luna haku konahali,” ni zeñwi cwalo; Kalebu ni Joshua ba kuzisa sicaba, mi bali, “Lwakona ku amuha mane ni kufita, kakuli Mulimu na lu sepisize yona! Hanina taba seo mulwanisi ali sona!”

⁵⁹ Mi lu sakona ku kutaza kaza foliso ya Bumulimu, ni kolobezo ya Moya o Kenile, mi lu sa na ni mata a Mulimu a lu kauhanya kwa lika za lifasi. Mulimu nabulezi cwalo! Lusika lwaba apositola halu sika fela, mi haluna kufela, lwa zwelapili.

⁶⁰ Kacwalo, lu fumana mucali yaswana wa kale wa kulyanganisa. Mi muhupule, sibi sani ne sisika swalelwa. Cwale,

muzwale, haiba ne sisika swalelwa kwani, kucwañi he cwale ka nako ye fo—fo peu ya niti ya masika kaufela hai taha hamoho?

⁶¹ Mulemuhe nto yetuna ye yana ezize Balami, nei zwezi pili cwalo cwalo, mi mafelelezo yayo felela ka kutaha kwa—kwa Judasi Isikariota, ni Jesu. Neli sikamañi? Judasi ni Jesu neli fela siswaniso sa Kaine ni Abele. Kakuli, ona mwana bezi Judasi wa bulapeli, niyena Kaine neli wa bulapeli. Kaine na yahile aletare, na ezize sitabelo, na lapelezi Mulimu, nali fela ya sephala ku zona sina yomuñwi mwana bezi. Kono, mwa bona, na sina sinulo ya seo Linzwi nelili lona. Na hupula kuli neli Adama ni Eva bene bacile ma apule kamba litolwana zeñwi. Mi Kaine... Abele, ka sinulo, na zibile kuli nekufo sahale; neli mali anaba lelekile, mi yena ki ha fa ngunyana. Mi Mulimu apaka kuli sitabelo sa hae nesi lukile. Mi kihba ni muna ni kulika ku bulaya munyana hae. Mi hana bulaile munyana hae fa aletare ye swana fana bulaezi munyana hae ili fone ku shwezi sitabelo sa hae, ngunyana nei shwezi fa aletare, kacwalo ki mwa nabezi ni Judasi Isikariota abeteka Jesus Kreste fa aletare ya Mulimu, ni ku Mu bulaya sina Kaine fela mwana bulaezi Abele. Kakuli, Kaine nali peu ya kulyanganisa.

⁶² Mi ki mwa nabezi Balami, mupolofita yalata mali, mutu yana lukela kuziba hande. Mi Mulimu amulemuska lisupo ni ze komokisa, mane nihaiba pelesa ya bulela ka malimi asili, mi niteni yena azwelapili ka mukwa oswana. Na pepezwi kuli abe—abe mucali wa bupumi.

⁶³ Mi haiba Jesu na akalelize kuli lusika lo kuli luka felela mwa kulyanganana koku kile kwaba teni, lusika lwa keleke ya nako ya Laodesia, kuenya, lusika lone lu Mu beile kwanda keleke, kana likona kuba sikamañi haisi kuba kulyanganisa! Kaniti, ku cwalo. Li felela mwa lusika lwani.

Mi neli Kaine ni Abele hape fa Kalvari.

⁶⁴ Cwale mulemuhe, sina kamita, ona fani Jesu hana tilo ya, naile kwa Lihalimu, Moya o Kenile no lumilwe. Yani neli Peu, mufani wa Bupilo bwa Linzwi, sina hane lu bulezi busihu maabani. Ki Ona o akufisa Linzwi ka mata. *Ku akufisa* katalusa “kutisa kwa Bupilo.” Moya o Kenile wa niti utisanga fela Bupilo kwa Linzwi Leo lili lona. Halina kutisa lituto za kuikupulela kwa Bupilo, Halikoni, kakuli ha Ki ze ama lituto za kuipangela. Ki Bupilo bwa Linzwi la Mulimu, kakuli ki Mulimu. Mwabona? Mi La fa mata Mubili wani.

⁶⁵ Cwale mulemuhe, kamo neba ezelize. Kasamulaho, mi ni Bibebe iize, mi—mi Joani na ambozi kwa bana ba hae mi ali, “Bana baba nyinyani, mu utwile kaza antikreste ya tahile mwa lifasi,” ali, “ili yo ali mwa lifasi haisali, mi usweli kubeleka mwa bana ba bahanyezi.” Cwale, fani neli kwa mulaho kusika taha kale Moya o Kenile mwendi kuli myaha ye mashumi amalalu. Lu fumana, Moya o Kenile ha ne utile, ona Peu ya niti, yena Mufani

wa Bupilo wa luli kwa Peu, mi kiha kutaha cwale kulyanganisa kwani hape. Mi mulemuhe, kiha i ikela onacwalo. Ne iile . . .

⁶⁶ Lona Linzwi la niti neli nyakisizwe, ba polofita ba kale bani neba nyakisisanga Linzwi la Mulimu kuba la Niti hane banze baya cwalo. Haiba mutu akile abala kaza Katengo ka Nicaea, kamba Katengo Kapili kaba Nicaea, mazazi ani a lishumi ka aketalizoho a lipolitiki za mali, fani likwata zani za batu ba Siroma kwani neba bata kutisa mwateni ni kueza kopano kuzwa mwa keleke yani. Bapolofita ne ba tile, ba apezi matalo a lingu, banze baca miloho, mi ba yemela Linzwi lani! Kono kisikamañi sene si ezahalile? Ne si na ni kuba sina Kaine, ne si na ni kuba sina Abele, alimuñwi nana ni kushwa. Luli, nekuli cwalo. Mi Linzwi neli latehisize susumezo ya Lona mwahala sicaba, mi kaufela bona ba latula Linzwi la niti mi ba ikungela lituto za kulyanganisa za keleke ya nako yapili ya Katolika. Neba ekelize popu fateni, neba ekelize bishopu, neba ekelize *se, sani, ni sesiñwi*. Ba zusize taluso yaluli ya niti ya Pitrosi, ni ya—ya—ya Maria, mi—mi bani kaufela bene ba siyezi; ba ikezeza milimu, mi batokwa kueza sesiñwi kwanda kuba sina mikiti ya buhedeni kwande yebizwa kuli bulapeli bwa Sikreste. Neli sikamañi sani? Peu ye lyanganisa! Mi ye ni kuongaonga, kuongaonga, ka nako yapili fa lifasi, yona keleke. Neli sikamañi? Peu yani ye lyanganisa yene kalile ku calwa, sesiñwi sa ku ekeza kwateni, kuzusa zeñwi.

⁶⁷ Yo kaufela yakile autwa, mwa Bibebe, kusaca nama la Bufaifi? Yo kaufela yakile autwa, mwa Bibebe, sika kaufela kaza kufafaleza mwa sibaka sa ku kolobeza, ku cimbeka? Yakile autwa lika ze kaufela, zakuli “Lumela, Maria” kamba sesiñwi? Kaufela yakile autwa kaza miinelo ye bolile ya batu ba Buipanguli baa, nibona? Poto haikoni kubiza ketele kuli i masila. Kulukile! Kuba, ya loba mulao ulimuñwi uba ni mulatu wa kuloba milao kaufela! Yo kaufela yakile autwa Mulimu kuli usweli ku belekela mwa katengo? Munibonise nako yeñwi fokukile kwaba katengo kaka pila. Neba shwile ona fani, mi haba sika zuha hape! Seli nako yakuli sesiñwi siezahale, seli nako yakuli Mulimu azamaye. Neli bulaile susumezo mwahala sicaba.

⁶⁸ Taba yeswana iezahalile kacenu. Li bulaile susumezo, bali, “Oh, sikwata sani sa bapikuluhi-babakenile, hakuna sesili ku bona.” Mi, kiñi, ki kulyangana! Mukopane ni Linzwi pata ni pata mi mubone Seo sili sona, mubone haiba Mulimu wa toloka Linzwi la Hae Tota. Mulimu wakona kueza kuli macwe afetuhe kuba bana ba Abrahama. Amen.

⁶⁹ Linzwi neli bonahalisizwe hande ka bona Bakreste bapili, kamo Mulimu nabalukuluzi kuzwa kwa lika kaufela, ni matuku, mi neba nani bapolofita, mi neba ambozi ka malimi, kutoloka, ni kufa mañusa ana bonahalile kuba onacwalo kuba niti nako kaufela. Kono mwa pata ya Linzwi lani leli nyakisizwe, sicaba

kiha si Li kasheza kwande, mi sa iketela kopano. Yani kiyena me wa likopano kaufela.

⁷⁰ Sibeli sazona li hulile cwale. Neli kalile kubeya lipeu hape. Ne i tilo shwa, kono ne i tilo shoshela hape mwa mazazi a Luther, sina halu ziba kuzwa kwa liñusa lapili kwanu kakusasana kwa mukushuko. Ne ishoshezi mwa lizazi la Luther. Cwale kisikamañi sene ba ezize? Kapili hasamulaho wa kushwa kwa muuna yomutuna yani, neba ikezelize katengo.

⁷¹ Ne ishoshezi. Mi hape mwa mazazi John Wesley, fani bani ba Anglican, ni lisilelezo zabona kaufela za kuyakuile mi litilo felela mwa tamahano ya buñwi, mi kisikamañi sesi ezahalile? Mulimu na nanuzi mutu wa libizo la John Wesley, ni ku bulaya taba yateñi kaufela. Mi ona fani hanatile shwa, yena ni Asbury ni bona, kisikamañi sene siezahalile? Neba ikongakongile, mi cwale muna ni mifuta kaufela yaba Methodist. Mi hasamulaho kwataha yomuñwi, Alexander Campbell, John Smith, ni bao kaufela.

⁷² Kakufeleleza, mwateni kwazwa ba Pentekota, yene zwile kuyona. Kiñi sene siezahalile kasamulaho? Neba matile hande, kisikamañi sene si mi tibezi? Nemukeni hape mwa sileze sesi swana sene muzusizwe kusona, kukutela hape mwa mukoti oswana, kukutela kwa kulyangana ni kupanga tutengo, ne mu na ni ku keshebisa fa Linzwi. Mi nako kaufela yeo Mulimu hana luma sesiñwi sesinca, nemusika i amuhela. Yani ki niti! Kulyanganisa hape! Mi, mulemuhe, sina hane Ni bulela busihu bobuñwi, kuli lutaka lwa pili lone lutile kuzwa kwa mubisi wo, kutaha kutoba matali ni ku pahama mwa sibunga, mi i kutela mwa lutaka hape, ni kumela. Lisina leli nyinyani lani la buloto libonahalanga sina sisansa luli kasibili, mi nelu hupula kuli neli yona, kono hamuka iapula, hakuna buloto mwateni ni hanyinyani. Sona ki sikapi fela sa bubeke seo bulukela ku hulela ku sona, mi sa shwa nisona, mi bupilo buzwa ku sona kukutela kwa bubeke. Mulemuhe, kacwalo babiza likeleke zene calilwe...

⁷³ Lufumana kuli kacenu mwa lika zelubiza kuli likeleke, nihaiba kwa ma Pentekota baluna, ki kone luile, nelusa utwisisi, neluna ni kupanga likwata zaluna bañi. Liki kaufela ze taha, neluna ni kuba ni *se*, neluna ni kuba ni *se*, neluna ni kuba ni sikuwata sesiñwi. Mi mutu yo ato yema, ali, "Uka taha fa lilu leli sweu." Yomuñwi uli, "Uh-huh, Uka taha fa mbongolo yesweu." "Ku lukile, luka eza likwata zepeli." Mwabona, kisikamañi sani? Kucala kulyanganisa! Ha ka taha, seo kaufela sili sona, Uka toloka Linzwi la Hae Tota Ha ka taha. Halu libeleleni kufitela sani asika fita. Muswale... Ku ambola kaza teni, mane hamuna kuutwa Liñusa la lizazi lateni. Kamita basupanga ku seo Mulimu akaeza, kamba Sa ezize kale, mi ba palelwa ku lemuha Sa sweli kueza. Cwalo kona molu keniseza teni kulyangana.

⁷⁴ Cwale lu lemuha kuli kacenu likeleke za luna, kaufela—kaufela likeleke za luna li calezi mwa moyo, mi lisweli kukutula kakundukundu. Halu sana ni mikopano ya litapelo, halu sana lisebelezo zene lu banga ni zona. Ki butata mañi? Luse lu itobohile kwa lika kaufela. Mutualime, mane nihaiba kwa likeleke zaluna za ba Pentekota, ba i nisa basali babañata baba kutile milili. Zani nelisa lumelezwangi. Kupenta lifateho zabona, kupenta manala a bona, ka mifuta kaufela; kutisa mutu kwanu ni...sina ma Ricky ni bao kaufela; kunyala halalu kamba hane, mi madikoni; oh, ki kulyanganana kokucwani! Ki masila! Kana baezanga cwani? Mulimu hakoni kuba ni zona mwa Keleke ya Hae, bana ni kuya kwa katengo kuli bakene teni. Yomuñwi kubulela sesiñwi ka sona, kakuli uka lahelwa kwande a katengo. Mulimu, aku lufe baana ba basina swalisano ni lika zeñwi kwanda Mulimu ni Linzwi la Hae, baba ka bulela Niti ka zona. Sani kona seo lutokwa luli. Kisikamañi selu ezize? Lu cezi kulyanganisa. Lu calezi mwa moyo, mi cwale ku kutulela mwa kakundukundu.

⁷⁵ Mulemuhe kuli lisweli ku kopanyiwa cwale kuli licikiye. Kana mulemuhe, Jesu naize, “Pili, muli kubukanye hamoho, mulitame mañata, mi kasamulaho mubeye mañata kaufela mwa sishañata silisiñwi, mi Ni ka licisa.” Kuna ni kañata kakalikani kakabizwa Methodist, Baptist, Presbyterian, Lutheran, kaufela zona likopanela hamoho mwa Katengo ka Likeleke za Lifasi. Kisikamañi seo? “Mulikopanye hamoho!” Haleluya! Kana mulemuhe, U kubukanya mufuka pili, ku uzusa mwahala buloto, ku u kauhanya, “Mu li kubukanye hamoho mi mulicise.” Kaufela zona lilukela kucisiwa ka likatulo za Mulimu, ka kucala kulyanganisa mwahala sicaba, lika zona zee... Kuba ni mufuta wa bumulimu, mi ni kulatula Mata ateni, ku latula Linzwi, ili fela ku kumalela mwa mikiti ya bulapeli, ya lituto za litumelo zeo yomuñwi abeile mwateni, kulika kubeya mwateni Linzwi la Mulimu. Halina ku beleka. Ki kulyanganisa.

⁷⁶ Na huwa kacenu, sina mone kubezi, mupolofita wa kale yomutuna kale, Amosi, hanatile mwa munzi, naize, “Na hani mupolofita, kamba yena mwana mupolofita. Kono haiba tau ibopa, kimañi yasike kusaba!” Na ize, “Mi Mulimu abulela, kimañi yasike apolofita.” Na nuhile katulo fa halimwa lusika, ali, “Yena Mulimu yaswana yemu ipapata ku sebeleza uka mi yundisa.”

⁷⁷ Mu beye se, si fumaneha fa tepu, mi muhupule. Yena Mulimu yoo... Sicaba se cwale sesi sweli ku kopanya kutulo yetuna ye ya—ya Katengo ka Likeleke za Lifasi, mi nimina muka tokwa kuli mukene ku kona. Hamukoni ku ikambusa kwande azona. Mukana mwa zwa mwateni munosi, kamba muka kena mwateni. Hakuna kuba mayemo a fahali. Ikaba nombolo ya sibatana. Hakuna mutu yaka leka kamba ku lekisa, konji yana ni nombolo, kamba yana ni ze lyangani. Cwale, muine kwahule ni zona!

Muzwe ku zona! Muli sabe! Mupile kwahule ni zona! Mulimu yeba ipapata kuli ba sebeleza ukaba yundisa. Yena Mulimu yomutuna wa lilato yasike . . .

Muli, "Kulukile, Jesu na lapezi kuli lube alimuñwi."

⁷⁸ Mi hape U ize, "Mukona cwani hamoho, bababeli ba zamaye hamoho, haba sa lumelelani?" Na ize "alimuñwi," sina Yena ni Ndate habali Alimuñwi. Mi Ndate nali Linzwi, mi Yena nali Linzwi leli bonahezi. Yena nali "Alimuñwi" ni Ndate, kakuli Nali ponahazo ya Linzwi la Mulimu lene li sepisizwe. Mi cwalo kona moku inezi kacenu, kamba lizazi lisili kaufela. Eeni, sha. Haili Mulimu ki Alimuñwi. Ubata luna kuli lube buñwi.

⁷⁹ Kana ku konahala cwani kuli *se sibe silisiñwi*, *yo* yomuñwi ulatula kupepwa kwa mwalyanjo, mi *yo* halumeli, ulatula foliso ya Bumulimu, mi *yo*, *yani*, kaufela bona mwa kulyangana ko kucwalo? Babañwi ba kubona mane haba lumeli nihaiba ku Mulimu, balumela kuli Nali fela Mwana Mulimu; balumela kuli Nali mwana Josefa, *kubizwa* kuba Mwana Mulimu. Kaniti. Limbile la ma Lutheran, ba Zwingli, balumela cwalo, mwabona Nali fela mutu yomunde hahulu. Ba Sayansi ya Bukreste baize Nali mupolofita, mutu fela sina kaufela baba siyezi, Nasi wa Bumulimu. Kiñi, haiba Nasi wa Bumulimu, kanti Ki mupumi yomutuna yo lifasi likile laba niyena. Nali Mulimu kusicwalo Nasi sesiñwi. Nali wa Bumulimu! Nali wa Lihalimu, Iliyena, aezwa nama mwahala luna, ku mutu ya nali Mwana Mulimu. Kaniti, sani kona Sanali sona.

⁸⁰ Cwale lubona kuli kulyanganisa ku keni mwateni. Lwa ziba kuli liteni faa, hakuna mutu yakona kuhana. Oh, mawi! Mulemuhe fela. Uka sinya sikwata sani sesi ipapata kuli si sebeleza Mulimu. Mu si tokomele.

⁸¹ Mulimu na cezi Peu ya Hae. Na kwala, kakuli seli nako ya kukala mukoloko wa ku lapelela. Mulimu na cezi Peu ya Hae, mi Peu ya Hae ki Kreste. Ni ka kutaza ka zona mwa masihu alikani, ko Mulimu na latile kuli abeye Libizo la Hae, haiba Mulena alata, mwendi ku iliñwi ya mikopano ya mukushuko ha Ni kaba ni nako yeñata. Mutualime, Kiyena Nzila inosi ya kumata ka yona. Yena kiyena Mubusi wa silena wa niti. Kiyena Mulimu wa niti anosi, hakuna usili kwanda Hae. "Ki na Mulimu, mi Mulimu anosi," Na ize. Jesu naize, "Ye kiyona taelo: Utwa wena, O Isilaele, Ki na Mulena Mulimu wa hao, Mulimu alimumu fela. Ki na Yena. Kiñi ha mubata usili? Yomuñwi uka taha . . . Na nitile ka Libizo la Ndate, mi hamu Ni amuheli. Kono usili uka taha ka libizo la hae, mi yena muka musaba." Mi neba ezize cwalo kwa Nicaea.

"Kana u Mukreste?"

"Ni wa Baptist."

"Kana u Mukreste?"

“Ni wa Pentekota.”

“Kana u Mukreste?”

“Ni wa Methodist,” libizo leliñwi.

⁸² Kono cwale ha i taha kwa Libizo lani la “Jesu Kreste,” ba zamaela kwahule ni Lona kamo ba konahalela, habana sa kueza ni Lona, kakuli Yena kiyena Linzwi mi Linzwi la ipaka Ililona. Mulemuhe, Nzila fela inosi ya kusaba kayona! Kiyena Palisa ya mwa Mukulo, Bibele iize U cwalo. Lilumbatina kaufela (mwa Bibele) la Mulimu kila Jesu Kreste. Nali yena Alfa, Omega, wa Makalelo ni Mafelelezo; Yena ya Na liteni, yena Ya liteni, mi Kiyena Ya taha; Mubisi ni Mwana wa Davida, sibeli sa Mubisi ni Mwana wa Davida; yena Naleli ya Kakusasana, yena Palisa yamwa Mukulo, kiyena Mulilima wa mwa Libala, kiyena Alfa, Omega, Ndate, Mwana, Moya o Kenile, kaufela li ku Jesu Kreste! Nali yena mutalelela wa Jehova Mulimu aezizwe nama kuli apile mwahala luna. Luli kona za Nali zona.

⁸³ Nali yena Palisa yamwa Mukulo. Kisikamañi sene ba ezize ka Palisa yamwa Mukulo? Neba I hamuzi mwateni, ku I hamula mwateni, kuli bazuse munko omunde ku Yona. Palisa yende ina ni ku hamuliwa kuli munge munko omunde kuzwa mwa palisa. Bwani neli Bupilo bobunde, nekusina bupilo sina Bwani ku bo bukile bwa bateni, kono Ne buna ni ku hamuliwa kuzwa fa Kalvari.

⁸⁴ Mwabona, neba ngile ona—ona tozo ya Palisa yamwa Mukulo ni kuto ibeya ku Aruni, nana ni kutoziwa ka yona kuli aye fapila Mulena mwa sibaka sesi kenile, mwa lisila leli kenile. Na nani kuba ya tozizwe ka Palisa yamwa Mukulo, kukena ni kuyo sasa fa sipula sa sishemo mwaha ni mwaha. Mi tozo yani ilukela kuba ku yena, munko o nunkela hande ku Mulena, kubeya mali a ngu fa pila hae, kasamulaho amano hasakiwa ki ngunyana. Litolwana ze fubelu ni mulangu ya tamilwe kwa liapalo za hae, nana ni ku zamaya ka muhato omuñwi, kulila kuli “kukena, kukena, kukena kufiwe ku Mulena.”

⁸⁵ Mulemuhe, Kiyena Palisa yamwa Mukulo yani, ona Munko onunka hande wani, ona Tozo fahalimwa sicaba sa Hae. Hamukoni kutaha fa pila Hae ka lituto za litumelo kaufela, sika sesiñwi kaufela, kono ki ka kutozwa ka Palisa yani yamwa Mukulo, ili Linzwi. Yena hape ki Mulilima wa mwa Libala.

⁸⁶ Cwale, mufumana cwani bunde bwateni? Mufumana bunde bwa teni hamunga mulilima ni ku uhamula, muka fumana bunde bwa teni. Baalafi ba itusisanga ona mwa libaka zabona. Munge muuna ya ikalezwi mi ufilikani, kamba musali, haikutwa sina ya bata kutakana, inza zamaya ni ku kuhuwa, hakoni ku ipuluka, mualafi ukanga mulyani wa mulilima wa hae niku ubeya mwa lizoho la hae kamba mwa musinga kokuñwi, kamba ku yena, mi kipeto wa kauha. Kwa fela fa nako nyana. Kono ona fokuka

sampukela mulyani wani, hape wa kala sinca, ka buhali kufita mwana bezi sapili.

⁸⁷ Kono Na mi bulelala, balikani, wani ki mufuta fela wa Mulyani ozwa kwa Mulilima wa mwa Libala wo Ni ziba. Kiyena Mulilima wa mwa Libala. Na hamuzwi fa Kalvari. Na titikezwi bumaswe bwa luna, ka miupa ya Hae nelu folisizwe. Ona mwani, ona ku hamula kwa mapalisa kwani, Yena nali Palisa. Nali Palisa yetuna ku ze kile za mela fateni, nali yena ya nali Mulilima wa mwa Libala, mi ona Palisa tuna ye yamwa Mukulo. Cwale Wa nyendaela busihu bo, ulepelela mwahala Lihalimu ni lifasi, Na lumela, Nali cwalo ka nako yani, nitaluse, kuli—kuli atakule sibi sa lifasi ni kutisa foliso hape mwa lifasi. Mi Bibele ibulezi kuli Kiya swana maabani, kacenu, ni kuyakuile.

⁸⁸ Mulikani, fani Mulimu hana bulelezi Mushe, mwa lihalaua, yeneli mufuta—mufuta wa Hae, kuli apaheke noha ya sipi. Mi kopa i yemela sibi se siatuzwi, noha i yemela, ona *noha ya sipi* i yemela “sibi se siatuzwi kale.” Sina, *sipi* ki “katulo ya Bumulimu,” sina aletare ya kopa ili kone ba lobazanga litabelo. Mi hape Elia atalima mwa halimu mi ali mahalimu naswana sina sipi, katulo ya Bumulimu fahalimwa na ha ye sa lumeli yene wile kuzwa ku Mulimu. Sipi i yemela katulo, katulo ya Bumulimu. Mi noha ne i yemela sibi se siatuzwi kale; mi Jesu nabile noha yene ezizwe sibi ka luna, mi aikungela katulo ya Mulimu ku Yena. Na titikezwi bumaswe bwa luna, na holofalizwe ka sibi saluna, koto yelufumanikozo ka yona ne iwezi Yena fa halimu, mi ka miupa ya Hae lu folisizwe.

⁸⁹ Oh, Mulimu una ni sikuwata sa Hae sesitezi Mulyani, busibu bo, sa mina. Mukreste mulikani, wa kula mi wa nyanda. Oh, ukatezi, seli fela nto ye tata ku wena. Hausa kona ku libeleta ni hanyinyani fa nako yeñwi, uka—uka lyangana mwa lizazi la kacenu lelupila ku lona le.

⁹⁰ Kana ne mu utwile mwa mutende wa *Life Line* busihu bo, ku seo neba bulezi, kuli—kuli Russia iize, ka '55, bona “kaniti baka zamaisa lifasi kaufela ka kutala”? Sani sisika ezahala kale, Kuungelwa kuna ni kutaha. Kacwalo ki bukaufi bo bucwani bwa teni, mulikani? Seli bukaufi luli kwanu ka ku suteleta.

⁹¹ Kana hamuna ku Mu bata busihu bo ka lipilu za mina kaufela? Kiyena Mulilima wa mwa Libala, mi Kiya swana maabani, kacenu, ni kuyakuile. Uteni busihu bo kuli Ananuhe fahalimwa batu ba Hae, sina fela Mushe hana nanuzi si—si sisupo, ku atulwa. Mi haki sibi fela, kono matuku. Muhipule, Jesu naize, “Sina Mushe mwana pahekezi noha ya sipi, ka mukwa oswana ni yena Mwana mutu uka pahekwa cwalo.” Kisikamañi seo Mushe na ipahekezi? Ka sibi, kusalumela, ni ka matuku. Jesu na pahekilwe, hape, ka sibi, matuku, ni kusalumela. Nali nto ye swana.

⁹² Cwale, busihu bo, mwa mazazi hane lubile ni kulyangana kwa, Jesu Kreste na sepisize mwa Luka, kuli mwa mazazi a... kusikaba kale Kutaha kwa Mulena, kukaba sina mone kubezi mwa mazazi Sodoma, mi ni Mwana mutu haka i patulula Iliyena, sina Mwana mutu hana i patuluzi Iliyena ku Abrahama ona kwani; Elohim, Mulimu, na ezizwe nama mwahala sicaba, mi apila kwani ni Abrahama mi amubonisa, amu bulelela seo Sarah na nahana (inza inzi kwa mulaho wa Hae) mwa tende, yo Na sika bona kale. Amu bulelela sana... Mi abiza libizo la hae kuli, "Sarah." "Abrahama," isi kuba—isi kuba libizo la Abrame, na kalile ka, kubulela kuli Abrahama. Isiñi Sarai, S-a-r-a-i; kono S-a-r-a-h, "Ukai musala hao, Sarah?"

Ali, "Uinzi mwa tende kwa mulaho wa Hao."

⁹³ Ali, "Ni ka ku potela kuya ka nako ya bupilo." Mi musali aseha. Ki hali, "Kiñi ha sehile?"

⁹⁴ Cwale, Jesu naize, "Ona fani kusikaba kale kulyangana kwa kukaba ku kubukana ni ku cisiwa, kuli Mwana mutu uka i patulula Iliyena mwa mukwa oswana sina Mwa kile aezeza kwani." Mi sani... Kisikamañi sani? Ki ku nanuha, sinca, fa pila mina, kuli Jesu Kreste kiya swana maabani, kacenu, ni kuyakuile. Kana mwa lumela cwalo? Halu inamiseni litoho za luna he kwa tapelo.

⁹⁵ Mulimu yomunde, lwa Ku lata. Linzwi la Hao ki—ki Sico se sitezi ni luna, Mulena. Lwa Si lata luli! Lu pila ka Sona, Mulena. Ku bonahala kuli likalulo za luna halikoni haki zetuna. Lu tabla fela kuina fa tafule ya Hao, kutinguluka Linzwi la Hao, ni ku ikola limbuyoti, Mulena, halu taha sina cwana, mizwale ni likezel i baba lekilwe ka Mali a Mwana Mulimu, ili yena muñi wa Mali a Hao. Mi lutile kwanu busihu bo, Mulena, lu beile kuli masihu a abe aku lapelela bakuli. Mi kuya ka Mañolo, No ize kuli "ka miupa ne lu folisizwe." Kona kuli haki nto yeswanelo kuli lu lapele he (kono ki ku ipulela fela libi zaluna), kakuli ka miupa ya Hao nelu folisizwe (pulelo yakwa mulaho). Oh, ki lizazi leli cwani la puluso! Ki—ki sepiso ye cwani ka Emmanuele! Kuli Ki Niti ya luli.

⁹⁶ No ize, "Nako nyana, lifasi halina ku Ni bona ni hanyinyani, kono mina muka Ni bona, kakuli Ni" (tuloka ndina twa kuli "Na") "Ni ka ba ni mina, mane ni ku mina, kuisa mafelelezo a lifasi." Mi kwa mafelelezo a nako, ona kufelelela ko kutuna kwa, No ize, kusika ezahala kale, kukaba sina mulilo wa Sodoma usika nela kale ni kucisa lifasi laba Macaba, kuli kuka taha sinulo hape ya Mwana mutu ona cwalo mone kubezi fela kwa Sodoma. Ndate, shangwe sicaba sitokwe ku latehisa se.

⁹⁷ Mi Na lapela, Mulimu, ka mukwa o bunolo, (haiba Ni bulezi ka mafosisa, uni swalele), kukena mwa swanelo. Na ba lata, Mulena. Ni—Ni lapela kuli basike ba latehisa lika ze. Bo haibe busihu bo butuna mwahala masihu, Mulena. Cwale bakuli

kaufela, baba zielehile, libofu, yo kaufela ali yena mwahali mo, Mulena, afoliswe busihu bo. Mueza libi kaufela a piliswe. Ona mwa lipilu zabona cwale, haiba ki mutu yasa lumeli, yena yo aamuhele Kreste ka nako ye. Aku alabe, Ndate. Ze kaufela limwa mazoho a Hao. Lu ipeya ili luna ku Wena, ku Ku bona hautaha mwahala luna.

⁹⁸ Mi No ize, ku Muñoli Joani 14:12, “Ya lumela ku Na, misebezi ye Ni eza ni yena uka ieza.” Mo lu zibela kuli No itibahalize Iliwena kwa sicaba, kakuli Wena ki wena Mupolofita yana bulezwi ki Mushe kuli uka taha. Neba sina bapolofita fa lilimo ze eza mianda anda, kulyangana nekuli kwa maneku kaufela, ibo Linzwi la Mulimu neli na ni ku talelezwa; kacwalo Linzwi laezwa nama, mi ni kulyanganisa kwaba ona cwalo. Mi, Ndate, lwa libona hape kacenu, kulyangana sekuba sishañata silisiñwi; mi lubona Linzwi ha litaha ka mukwa oswana. Aku lu fuyole busihu bo, Ndate. Lu ipeya ku Wena, ka Linzwi la Hao. Seo kaufela Unani kuli lu sieze, ueze ni luna, Mulena. Ka Libizo la Jesu. Amen.

⁹⁹ [Kezeli yomuñwi ubulela ka lulimi lusili. Hakuna manzwi fa tepu—Mu.] Halu zibi Sa bulezi. Hakulata ubata ku lu bulelela sesiñwi, kacwalo mube fela ka likute fa nako nyana. [Hakuna manzwi fa tepu. Muzwale yomuñwi ufa toloko.]

¹⁰⁰ Amen. Kana mukile mwa bala [Hakuna manzwi fa tepu—Mu.] Mañolo fo sila hana taha, mi kaufela neba kopani hamoho, mi ba...sila nali mata amatuna luli. Mi Moya wa Mulimu wa suluhela mutu, mi wa mu bulelela, mi kiha polofita, mi abulela kwa kuya ni kuyo libelela, mi ba koma sila sa bona. Ki fani sa kuta hape. Kuna ni sibaka sa kusinya sila hao, mwabona, munge lizoho la Mulimu. Lizoho la Mulimu ki Kreste, luli faa, lona Linzwi, kacwalo mube ni Seo mwa lipilu za mina halunze lubiza mukoloko wa litapelo.

¹⁰¹ Na lumela Billy ufile makadi a litapelo hape kacenu. B, ma B, halungeni B, mashumi aketalizoho ka aketalizoho. Busihu bwa maabani, neluna nib a lishumi kaba keta lizoho maabani busihu. Lulikanga kunga ba lishumi ka baba ketalizoho. Mi cwale muswale makadi amina, luka anga, cwale. Halu likeni fa lishumi kaba ketalizoho. Eite-faifi. B, sina Branham, mwa ziba. B, eite-faifi kuisa mwanda. Mi lu...Halu boneñi, kimañi yana ni B, eite-faifi, mu nanule lizoho la mina. Mu sepalahile...Oh, kwa mulaho, ku lukile, eite-faifi atahe.

¹⁰² Cwale, mwanaka...Kacwalo kuli kuna ni baenyi mo, baba sa zibi se mo si ezahalezi. Mwanaka wa tahanga kwanu, kamba mutu yomuñwi; haiba hakoni ku taha, Muzwale Borders, usili fela. Mutu yomuñwi uka taha, ni kunga makadi, aeza mwanda abona, mi kuyema fapila batu ni ku a kopanya kopanya hamoho. Kacwalo he wa mi fa makadi, hakoni ku mibulelela kuli mukaba kwanu kwa pata, ha ezangi cwalo. Kamba mane Na ha ni

zibangi. Ni tahanga busihu, ku comola fela a lishumi kamba ka aketalizoho, mwahali cwalo, mwa makadi. Sani hasina sa kueza ni foliso ya mina. Wa kona kuina ona kafo. Mutualime, maabani busihu. Ki babakai bene bali mo maabani busihu, halu boneni mazoho? Kamo batu neba folisezwa mwa mukopano kaufela!

¹⁰³ Cwale, yani neli eite-faifi, eite-sikisi, eite-sebene, eite-eiti, eite-naini, nainte. Halubeni ni ona cwale inza taha cwale. B, eite-faifi, eite-sikisi, eite-sebene, eite-eiti, eite-naini, nainte. Yani ilukela iliñwi... Luli, lu tokwa... Mi haiba yomuñwi... Kiye yeñwi fa, eeni, yeka ba taba yende. Nainte, nainte kuisa fa mwanda cwale. Nainte, nainte-wani, nainte-tu, nainte-sili, nainte-fo, nainte-faifi, nainte-sikisi, nainte-sebene, nainte-eiti, -naini.

¹⁰⁴ Haiba hamukoni ku shenya, haiba muteñi mo... Na bona luna ni zeñata nyana, lipula za mawili zetalu mo cwale, zene za zona, Na lumela, Na bona. Haiba muna ni kadi ya tapelo, yani—yani ki nombolo ya mina ika bizwa, mi hamukoni ku zamaya, mu nanule fela lizoho la mina, luka mi pikuluseza kwanu.

¹⁰⁵ Mi haiba hamuna kadi ya tapelo, muine fela onafo mi mulapele, mi muli, "Mulena Jesu, haibe—haibe—haibe na busihu bo." Ki babakai mo ba basina kadi ya tapelo, mu nanule mazoho amina. Oh, mawi! Ku lukile, cwale halu buleleni fela cwana, Na sepa ha si utwahali kuba nto ya kashwau. Kono kuna ni musali yomunyinyani yana sina kadi ya tapelo, lu bulele cwalo. Kiha ya inza shela mwa sicaba, ki hali (cwale muteeleze hande), "Haiba Nikona fela kuswala sapalo sa Muuna yani, Ni kaba hande." Ki babakai ba baziba likande? Ku lukile. Mi kisikamañi sana ezize? Na Mu sweli, mi aya ayoina fafasi. Mi Jesu asikuluha, Na zibile fana inzi. Ki niti yeo nji? Na zibile sene sili butata bwa hae. Ki niti yeo nji? Na zibile seo butata bwa hae nebuli sona, kacwalo A mubulelala butata bwa hae. Mi musali kiha ikutwa mwa mubili wa hae kuli mweya ne utuhezi. Ki niti yeo nji? Ki kabakalañi? Na Mu sweli.

¹⁰⁶ Cwale, ki Bakreste babakai busihu bo kacenu ba baziba, kuya ka Maheberu, Buka ya Maheberu, kuli Jesu onafa cwale ki Muprisita Yomutuna, yena Muprisita Yomutuna yakona ku swaliva ka maikuto a matuku aluna? Ki Yena? Ku lukile, haiba Ki yena Muprisita Yomutuna yawsana, yona ofisi yeswana, Muprisita Yomutuna, fohe Uka eza cwani he? Uka eza ka mukwa oswana wa Na ezize ka ona kwani. Kana mwa lumela cwalo? Uka eza ka muinelo oswana sina Mwa kile a ezeza kwani, haiba mwa kona ku lumela cwalo. Ku lukile. Ki babakai baba lumela cwalo, mu nanule mazoho amina, muli, "Na luli na lumela"?

¹⁰⁷ Ku lukile, basika eza kale mukoloko wa ku lapelelwa, halubeñi ni mukoloko wa ku lapelelwa kwani. Na ziba Utensi mo. Na—Na—Na utwa Kubateni kwa Hae, mi Na—Na ziba kuli Utensi mo. Amutahe. Mukoloko wa ku lapelelwa ulukile? Ne nika biza

kwani. Mina mu—mu lapele fela, mutualime fela kwa neku le mi mulapele, mulumele fela.

¹⁰⁸ Musizana yomunyinyani yainzi fa usweli kuni talima, yainzi bukaufi ni musali ya tinile magilasi. Kana hamuboni Sesi sweli ku lepelela fahalimwa musali yani? Mutualime kwanu. Mwabona? Ukatazwa ki butata bwa pilu. Wa lumela kuli Mulimu uka ku folisa? Haiba wa lumela, nanula lizoho la hao. Bwani kona bone buli butata bwa hao. Yeo ki niti. Cwale haiba bwani neli butata bwa hao, nanula lizoho la hao kuli batu babone, nanula lizoho la hao ona cwalo. Cwale, hau sana butata bwani ni hanyinyani cwale. Tumelo ya hao i kupilise.

¹⁰⁹ Yena kiya swana maabani, kacenu, ni kuyakuile. Oh, kuna ni kulyangana; kono Jesu Kreste ki ya swana maabani, kacenu, ni kuyakuile. Ki yona . . . Cwale Jesus Kreste kiya swana muzwelepili ku lapela, mwabona, hamulukeli kuba kwa halimu kwanu, kuli mukone kuziba.

¹¹⁰ Cwale, yo kiyena musali. Kuya kamo Ni zibela, Nali kuba ni mubone mwa bupilo bwaka, ki musali fela ya yemi fa, mi una ni kadi ya tapelo, mi nasazibi kuli uka bizwa kamba kutokwa. Mutu yomuñwi ukufile kadi ya tapelo, mi wena—nombolo ya hao ibizizwe, kacwalo utile kwa pata. Ki niti yeo nji? Mi Na hanina mukwa wa kuziba seo uli sona, yo uli yena, ko uzwelela, so bata, hakuna kaza sona. Na ni mutu fela, wena u musali. Yani ki niti. Siswaniso sesiswana se nesikile sa taha nako yeñwi mwa Bibele, Muñoli Joani, kauhanyo yabu 4.

¹¹¹ Cwale uli, “Kisikamañi so ezize, Muzwale Branham, ona fani, nako ye fitile?” Ki kuhoha fela nyana ka swanelo yani, mwateri. Ha ni zibi, mwabona. Yena ulukela kueza cwalo. Na hani zibi. Musali yani kwani? Na hanisika mubona kale musali yani mwa bupilo bwaka. Yena ki muenyi luli kuna. Na sepa neli musali. Ki ufi mutu ya folisizwe onafa kafo mwahala sicaba? Kana muka . . . Eeh. Lu baenyi ku yomuñwi ni yomuñwi. Haiba yeo ki niti, nyanganyisa lizoho la hao sina *cwana*. Mwabona? Nali kuba ni mubone musali yo. Kono nainzi fani, inza lumela. Cwale, usweli sika Sesiñwi, nji cwani? Nekusike kwaba hande hana ka swala na.

¹¹² Kono cwale kana hamuboni kuli Bibele ki Linzwi la Mulimu lelitezi? Yena kiya swana maabani, kacenu, ni kuyakuile. Lu fetuha kuba litabernakele za Moya o Kenile yeili Kreste. Mwabona? Yani kona Peu ya luli. Cwale haiba Moya o Kenile wani ukena mwa Peu ya luli ya Linzwi, isiñi . . . Haina kunga fela siemba sa Lona (kakuli, diabulosi kiyena ya itusisanga zona), mulukela ku Linga kaufela lona, mwabona, Linzwi kaufela la Lona; kakuli, Yena haki Mulimu wa licika, Yena ki Mulimu kaufela. Mwabona? Mi sani kona sesinga sibaka.

¹¹³ Cwale, kiyofa musali, Nali kuba ni mubone. Jesu na fumanu musali inge enayo, mwendi isiñi ka miinelo yeswana, Ha ni zibi.

Mi Na inzi fa lisima. Na—Na nani kuya kwa Samaria. Mi lu fumana kuli, Samaria neili mwatasa lilundu. Mi—mi Naya kwa Jeriko, nitaluse, mi ki Ha ya ka nzila ya Samaria, mi ataha kwa munzi wa Sikare. Mi ki Ha inafafasi fa lisima, mi alumal balutiwa ba Hae kuyo bata lico.

¹¹⁴ Kuna ni mifuta yemikai ya batu mwa lifasi? Yemilalu. Kama, Sema, ni sicaba sa Jafeta. Kaufela luna luzwa ku Nuwe. Mi lifasi leli siyezi neli sinyizwe ka nako yani. Ki mifuta yemilalu fela ya batu, ki Majuda, Bamacaba, ni ma Samaria (bene bali siemba sesiñwi Majuda ni Bamacaba). Mi yani kona fela mifuta ya batu yeli mwa lifasi, mwabona, yemilalu fela.

¹¹⁵ Lik a kaufela ku Mulimu li petahalile mwa bulalu. Sina fela lika zetalu zene Ni ambola kazona busihu bo: likalulo zetalu za kulyangana, likalulo zetalu za Linzwi ha li ezwa nama, ni zeñwi cwalo. Mwabona?

¹¹⁶ Cwale, mi Yena—Yena yana bulezi kwa Majuda, abulelela Filipi, fani hana tisize Natanelia, kwani kwana inzi, mi ali, “Ni muboni hanali mwatasa kota.” Na bulelezi . . . Andreasi ni kutisa Pitrosi kwateni, Ki hali, “Libizo la hao ki wena Simoni, mi uka bizwa ‘Pitrosi’ kuzwa kacenu.” Ali, “Wena u mwana Jonasi.” Mwabona? Cwale, bani kaufela nebali Majuda.

¹¹⁷ Kono fa Uya kuba Macaba . . . isiñi kwa Macaba, kono neli Musamaria.

¹¹⁸ Cwale seli nako yaba Macaba. Na sikabe aeza sani kuba Macaba. Mubale Mañolo. Batili. Kono Na sepisize, mwa Luka 22, kuli Uka eza cwalo asika Taha kale.

¹¹⁹ Kono Na inzifafasi kwani, mi fa sekutaha Mujuda siemba sesiñwi ali wa Macaba, musali. Mi ki Hali ku yena, “Musali, aku Nife kwa mezi ninwe.”

¹²⁰ Musali ali, “Kiñi, ha ulukeli ku buza cwalo, hahulu. Luna luba . . . Kuna ni ketululo kwanu. Wena u Mujuda, mi—mi Na ni Musamaria.”

¹²¹ Yena ali, “Kono kambe wa ziba Yo sweli ku ambola ni yena, neu ka Ni kupa mezi.” Kisikamañi sa Na sweli kueza? Kuswala moyia wa hae. Mi ona fani a Natilo fumana seo butata bwa hae neli bona, kihande, A mubulelela kuyo biza muuna hae. Musali ki habulela kuli nasina niyomukana. Kiha ali, “Yani ki niti, ubile ni ba ketalizoho.”

¹²² Cwale, mutualime, fani Bafalisi hane ba Mu boni aeza cwalo. Kulukile, ona kulyangana kwani mwahala Linzwi, kisikamañi sene ba bulezi? Neba ize, “Muuna yo ki Balezebubi, mu lauli.” Mwabona?

¹²³ Mi Jesu naize, “Yo kaufela yana ka bulela sani ka Moya o Kenile ha U ka toeza lika ze swana, nasike a swalelw.” Ki kwani kulyangana. Mwabona? Kono Naize kuli Uka ba swalela

hasamulaho, kakuli Moya o Kenile nosika taha kale; Sitabelo, Ngunyana neisika shwa kale.

¹²⁴ Kono musali nasika hupula cwalo. Musali kiha li, “Muñaka, Ni lemuha kuli U mupolofita.” Neba sina mupolofita ka lilimo ze mianda anda. Ali, “Ni lemuha kuli U mupolofita. Cwale, lu ziba kuli Mesia, ya bizwa yena Kreste, yena Ha ka taha, sani kona sa Ka to eza.”

¹²⁵ Kulukile, haiba sani kona sa Na ezize, konakuli ki Ya swana maabani, kacenu. Kona mwa Na itibahalisize Iliyena ka nako yani, kana haki nto ye swana kacenu? Ilukela kuba cwalo! Cwale, kiyo fa musali ni muuna ba kopana hape. Haki yena musali yani, Na hakina Muuna yani. Kono ibo Moya o Kenile oswana uteni mo, ma wafa sepiso ya misebezi ya Na ezize, luka eza ze swana mwa mazazi a Mwana mutu haka patululwa.

¹²⁶ Cwale, kusina ku kuziba (mi wa ziba kuli yeo ki niti), luna lu baenyi ku yomuñwi luli, mi wena uyemi fa. Kuna ni babañwi . . . Mwendi sesiñwi si fosahalile ku wena, mwendi hakuna, Na hani zibi. Kono haiba Mulena Jesu uka patulula kuna, ka Moya o Kenile wa Hae, butata bwa hao ki bufi, kana uka lumela kuli Ki Mwana Mulimu, mi isi mutu wa butu? Se ki sibyana fela, tabernakele ye yeo—yeo Mulimu aitusisa, yo kaufela A ketile. Yena—Yena ueza zani ka muhau oipitezi ni kuketa. Kacwalo, kono wa lumela. Ukaeza cwalo? [Musali uli, “Amen.”—Mu.]

¹²⁷ Ki babakai mwahala sicaba baba ka lumela cwalo? Fa sibeli saluna lu yemi fapila Liseli, kuli ha lusika be lu kopana fateni mwa bupilo bo, hanina muhupulo ni hanyinyani ka yo musali yani ali yena, seo ali sona, kwa zwelela, sa bata. Nali kuba ni mubone mwa bupilo bwaka, kwali kuba kuli Ni bone musali yani mwa bupilo bwaka *kwanu*. Kono, mwabona, kise se Ni lika kuli mu eze: muzuse kulyangana kwani kuzwa ku mina cwale, mi mulumele Linzwi fo Linzwi hali ezizwe nama ona mwahala luna mo. Linzwi liba leli pila mwa mibili yaluna luli, sani si bonisa Pata ya Mulimu.

¹²⁸ Cwale Ha alabe musali yo. Ubata taba ye swanela. Ha na mwana, ubata mbututu. Ubata kueza lilimo ze mashumi amane za kupepwa. Sani ha si konahali luli.

¹²⁹ Bainzi ona kwani cwale, basali bene bali baba sapepi mwa bupilo bwa bona kaufela, mi bataha kwa pata sina cwana, mi Mulena wa bafa bana. Babañwi ba kumina mu nanuzi mazoho amina baba ziba. Mwabona? Mwabona? Ne ni fumanu musizana yomuñwi yomunde zazi leliñwi, la Sunda, hane Ni zwile *kwanu*, la Sunda musihali; kuli bo mahe neba sapepi, Mulena ha bulela. Mi musizana yomunyinyani yani, mutu yomunde cwalo, kana uteni mo nji? Uinzi kai? Eeh. Ki yo fa, ona kwanu, uinezifafasi fa. Bo mahe bainzi fani. Kiyofa musizana yo munyinyani, kasibili. Mwa mubona? Nali Linzwi leli bulezwi kuzwa ku Mulimu.

¹³⁰ Cwale, kikuli muka Mu lumela ka lipilu zamina kaufela? Kana mwa lumela mbuyoti ye munani yeo, yeo mu utwa mwahali ku mina cwale, kana Mulimu ubile a alaba? Haiba Mulimu uka ni bulelela libizo la hao, kuli ubeye mwana libizo, kikuli uka lumela? Cwale, Ma. Thompson, wakona kuya kwa hae mi ube ni mbututu wa hao, haiba wa lumela ka pilu ya hao kaufela.

¹³¹ Kana wa lumela ka pilu ya hao kaufela? Ube fela ni tumelo, usike wa kakanya, ulumele fela Mulimu. Mulimu ki Mulimu.

¹³² Mu cwani, muñaka? Na sepa lu baenyi, niluna. Nako inosi fela ye Ni kuboni mwa bupilo bwaka, sina mo Ni zibela, kona ona fani hane utaha. Mi Ne ni hupula kuli mwendi u malume wa Muzwale Shakarian, kamba yo... Mashagian, Muzwale Mashagian, muopeli, hane utaha. Mi cwale se Ni kubona unzo ya mwa mukoloko wa ku lapelelwa. Cwale, kakuba muenyi ni wena, mi, kamba ku wena, mi Na ni muenyi, miinelo kaufela. Cwale, haiba Mulena Jesu uka ni bulelela sina se—se uli sona, mwendi so bata, lu bulele fela kuli; ku kubulelela, kumi bulelela so bata. Cwale, Yena ukufile sona kale. Sika fela ki tumelo yeñata ya kulumela cwalo.

¹³³ Cwale, ki babakai baba utwisia cwalo? Ki tumelo yeñata fela ya kulumela kuli ukaba ni zo kupa! Mwabona?

¹³⁴ Cwale, cwale, haiba utile kwanu ubata sika, mi Wa kona ku ni bulelela takazo ya hao, mi wa ziba kuli Na hani zibi takazo ya hao, konakuli ilukela kuba Sesiñwi sesi sweli kueza cwalo. Cwale, kuya ka Linzwi, Na sepisize ku eza on cwalo. Na zibile mihipulo mwa lipilu za bona. Ki niti yeo nji? Ku lukile.

¹³⁵ Una ni takazo yetuna kuli u foliswe. Taba iliñwi, u nyandiswa ki buino bwa ku ikalelwa, ku ikalelwa luli. Yani ki niti. Taba yeñwi, una ni butata bwa mukokoto, mi mukokoto wo ubile butuku hahulu fa nako nyana, mane ubile ni ku pazuliwa ka wona. Seo KISONA SA BULELA MULENA. Yani ki niti. Mwabona. Yani niti. Mi kiye fa taba yeñwi, takazo ya hao yetuna, kikuli, ubata ku amuhela kolobezo ya Moya o Kenile. Yani ki niti luli. Taha kwanu.

¹³⁶ Mulimu yomunde, ka Libizo la Jesu Kreste, muuna yo ha tazwe ka Moya o Kenile, asika zwa kale fa sibaka se, ka Libizo la Jesu. Amen.

Cwale aku U amuhele, muzwale. Fela ube ni tumelo, usike wa kakanya.

¹³⁷ U ikutwa cwani? Na sepa, kuya kamo Ni zibela, kuli lu baenyi ku yomuñwi ni yomuñwi. Haiba yani ki niti, kiñi, kuli sicaba sizibe, aku nanule fela lizoho la hao kuli babone kuli lu baenyi. Nali kuba ni mubone mwa bupilo bwaka, kakuziba. Mi Na sepa hasika ni bona kale, konji fela mwahala sicaba. Kakuli Ndate wa Lihalimu wa ziba, mi ki Le fa Linzwi liteni fa, kuli Nali kuba ni mubone musali yo, kakuziba, mwa bupilo bwaka. Kabakaleo, na hanizibi so bezi kwanu, hanina muhupulo wa seo uli sona,

sikamañi, kamba hakuna sesiñwi ka wena. Na hakuna seni kona kuku bulelela ni sesikana.

¹³⁸ Taba fela, ki mpo fela. Haiba Na kona...Sina hamu ni utwile ninze ni talusa sani fa nako yefitile. Mu sutelele fela, muutwa Sa bulela; se Ni bona, Na kona ku si bulela. Sa Sa buleli, Na hanikoni kubulela. Nika bulela seo ka na muñi fela, mi ne sika fosahala. Mwabona? Ne sika fosahala. Kono haiba ki Yena ya bulela, ki sa niti ka kusepahala. Ha si koni, ha sisika ba sesi fosahalile ni kamuta. Hasina ku fosahala ni kamuta haibile ki Mulimu. Mwabona? Mwabona, kakuli Mulimu hakoni ku fosa.

¹³⁹ Kono haiba Mulimu wakona kuni bulelela so bata, seo takazo ya hao ili yona, kamba—kamba so bezi kwanu, sesiñwi so ezize, kamba sesiñwi, sesiñwi sesi cwalo, kamba yo uli yena, ko zwelela, kamba seo kaufela Abata ku ni bulelela, noka lumela? Ni itumezi.

¹⁴⁰ Taba iliñwi, una ni butata ka mautu ahao. Mautu ahao aku kataza. [Musali ubulela kuli, “Eeni.”—Mu.] Yani ki niti. Aku nanule... Una ni butata bwa sisali, buino bwa sisali. [“Eeni.”] Mi una ni takazo yetuna mwa pilu ya hao, kakuli u latehezwi ki mutu yomuñwi kamba sesiñwi. Ki mushimani, mi mushimani wa hao utobile fa lapa, u matile, mi ubata kuli ni lapele kuli akute. [“Eeni.”]

¹⁴¹ Mulimu mwa Lihalimu, mulumele mwana hae, ni foliso. Mi Moya o Kenile ha u yemise mucaha yani fa mukwakwa busihu bwa kacenu, aku mulumele akute kubo mahe. Ka Libizo la Jesu. Amen.

¹⁴² Yena Ya ziba uka mulumela ku wena. Usike wa bilaela. Lumela cwale, usike wa kakanya. Fela ube ni tumelo, ka pilu ya hao kaufela. U lumele, mi Mulimu uka bona ze siyezi.

¹⁴³ Cwale, ona ku lemuha koku lalu kamba kokune kwani, seo kaufela nesili sona, mwabona, Ni—Ni ile fela kufitela liba bubofu kuna. Hanikoni ku talusa sani, hakuna mukwa wa ku tatulula sani. Mu li, “U talusa kuli, ona sani fela neli sesitura kufita kutazo yo kutilize mizuzu ye mashumi amane ka yemine kamba ye ñata, kona mo hupulela?” Eeni, sha. Kambe neli lihola zetalu, nekusike kwaba hahulu cwalo.

¹⁴⁴ Musali nasweli mungundo wa sapalo sa Mulena luna Jesu. Mi batu bani haba ni swali. Kiñi, musali yo fa, aku talime kwanu, na kona... (Ni kambeke mazoho. Mwabona?) Uni sweli kaufela, hakuna sika seni kona kueza, Na ni mutu fela. Kono ulukela ku Mu swala. Mi Na, ka mpo, fela—fela... silukela fela kuya, butu bwaka kaufela bwa zwa, mi Na ni bulela fela se Ni bona. Mwabona? Mi kipeto. Mwabona, ku ni swala na haku talusi sesiñwi, kono uswala Jesu kufitela kuna. Cwalo kona musali yani mwana swalezi Mulimu kufitela ku Jesu, kanti Yena nasazibi sene sili butata bwa hae. Na sweli fela sapalo sa Hae, aya mi aina fafasi. Mi Yena ali—mi Yena ali, “Kimañi ya Ni sweli?”

¹⁴⁵ Mi ba apositola sebali, “Kiñi, mutu kaufela usweli ku Ku swala. Kiñi ha U bulela cwalo?”

Yena ali, “Kono Ni lemuha kuli mata azwile ku Na.”

¹⁴⁶ Cwale, mwa ziba seo mata ali sona? Kutiya. Na fokozi ka musali alimuñwi yana Mu sweli, mi Yena nali Mwana Mulimu. Kucwañi he ku na, mueza libi ya pilisizwe ka sishemo sa Hae. Mwa ziba kuli kinto yetuna? Kakuli Na ize, “Lika ze Ni eza ze, ni mina muka lieza. Mane nikufita ze muka lieza, kakuli Niya ku Bo Ndate.” “Zetuna,” kona mo I bulelezi, kono toloko ye lukile ya Sigerike ki, “Zeñata kufita ze muka lieza.”

¹⁴⁷ Cwale, musali yo ha Ni muzibi. Hakuna seni ziba ka yena. Yena ki muenyi kuna luli sina batu babañwi moba bezi. Luna lu baenyi ku yomuñwi ni yomuñwi. Ili kuli fela batu bazibe, wakona ku nanula lizoho la hao, uli “haluzibani lu baenyi.” Cwale, Mwana Mulimu, haiba Yena nako yeñwi nakile akatana musali fa hule nyana sina cwana, fa lisima, mi A ambola ku yena fa nako nyana, mi Na zibile kone kuli butata bwa hae, mi A mubulelela sene sili butata bwa hae. Mi kacwalo musali nazibile ka sani, kuli yani neli Mesia. Cwale sani—sani Ni... U ni sweli, Nina ni kusweli, mi hakuna sesi ezahalile. Kono haiba tumelo kaufela (ka mpo) ni mpo ya hao (ka kulumela ku yona) yakona ku Mu swala, mi Wa kona ku bulela ka luna... kufitela kuna ku wena, mi muka ziba kuli Utensi mo sina mwa Na bezi fani fa—fa lisima la Sikare. Mwabona? Yena ki ya swana maabani, kacenu, ni kuyakuile. Mwa lumela cwalo?

¹⁴⁸ Una ni matata amañata hahulu, manyando amañata hahulu, maswenyeho! Iliñwi ya lika zetuna yeo ubata ku lapelelwa ka yona ki kuopa mwa lingongo. Yani ki niti. Ki niti yeo nji? Uka talizwe ki kuopa mwa lingongo. Ha uka bona unanule lizoho la hao...

¹⁴⁹ Mi nosweli ku zamaya hanyinyani kabunya, ze ni kona ku hupula hande. Mwendi ulitele fela fa muzuzu, mwendi sesiñwi sakona ku bulelwa sesika kona kunga... Kamba, mwa ziba, utwa lika zeñwi; sicaba, mwa ziba, sina moyo osweli ku buyelela Fateni. Babulela kuli, “Kiñi, u nuhile sani,” kamba, mwa ziba, ze cwalo.

¹⁵⁰ Kono, ubonahala kuba mutu ya iketile, ambola kuna fa nako nyana fela. Halu yeme fa hanyinyani fela, kakuli Ni nahana kuli kuna ni sika sesiñwi sesili mwa pilu ya hao sobata ku Mulimu. Cwale, Na hanikoni ku alaba tapelo ya hao, kono Yena wakona ku... Kakuli, haiba wa lumela cwalo, ku alabilwe kale. Kono haiba ubata fela ku lumela; ku ukone ku lumela. Cwale, Na mibulelela, ki taba ye ama mulatiwa ya siyo mo, mi yani ki muzwale, mi muzwale yo hayo mane nihaiba mwa naha. Uinzi mwa naha ye bata, moku na ni masa amañata. Ni bulele kuli kokuñwi ko kuswana sina kwa Michigan kamba kokuñwi... Eeh, kwa Michigan kona kwa inzi. Mi ukula butuku bo bumaswe,

mi bwani ki bo busina kalafo butata bwa lipiyo kona bwa katazeha kabona. Yani ki niti, nji cwani? Sani KISONA SA BULELA MULENA. Cwale, taulo yo nani mwa lizoho la hao, yono nanuzi ku Mulimu, uilume ku muzwale wa hao mi umu bulelele kuli asike a kakanya, kono a lumele, mi sani, uka foliswa cwale uka lumela cwalo.

¹⁵¹ Wa lumela ka pilu ya hao kaufela? Mwabona, konakuli, haiba wa lumela, kuna ni fela taba iliñwi ya kueza, ki, ku amuhela ka ku talelela. Ki niti yeo nji?

¹⁵² Cwale mu li, “U sweli kutalima ku sani, batu bani. Sani kona sa sweli kueza, ku ba talima.” Mu bone seo hahulu!

¹⁵³ Kono kuli mutokwe kuziba se... Musali yo fa, aku tahe kwanu ona cwalo, kalibe, kwanu, mukuli, yo kaufela uli yena. Hani talimi yena. Kana wa lumela kuli Mulimu wakona ku patulula kuna butata bwa hao? Nanula mazoho a hao, haiba ulumela, musali yo kwanu, musali yo kwanu, mukuli. Eeh. Eeh. Ku lukile, mi haiba ulumela cwalo ka pili ya hao kaufela, butata bo bwa sifuba habuna kuku kataza ni hanyinyani. Ku lukile, zamaya kwa ndu ulumele cwalo! . . . ? . . .

¹⁵⁴ Ne ni sika mutualima, nji Nekuli cwalo? Mwabona, Yena . . . Mutualime sina kwa neku *le*, pono iteni hakuna taba ka nga sibaka. Amen! Kana hamuboni cwalo? Ka ku petahala fela onacwalo Mulimu mwakona kupetahalela!

¹⁵⁵ Wa lumela, niwena? Sifuba sakona kuku tuhela, niwena, nji hasikoni? Wa lumela sika zwa? Ku lukile, zamaya u bulelele Mulena Jesu kuli—kuli wa Mu lumela.

¹⁵⁶ Yomuñwi ulukela ku itukisa pafa—pafa yeñwi cwalo haiba butuku bwa sifuba bwani buku swala, kono habuna ku kuswala. Ha una, ku lumela kuli kucwalo, nji cwani? Wa lumela kuli ukaba hande? Ikele mwa musipili wa hao, mi Jesu Kreste u ku folisize.

¹⁵⁷ Butata bwa pilu bwa bulayanga batu, kono ha bu lukeli ku kubulaya. U lumele kuli Mulimu uka kufolisa ku bona, miaku folise? Uzamaye unzo lumela cwalo ka pilu ya hao kaufela, uli, “Na kanti na lumela ka zona.”

¹⁵⁸ U bulela Sikuwa? Wa utwa Sikuwa? [Muzwale Branham ukupa mutoloki—Mu.] (Yomuñwi atahe.) Eeh, ku lukile. Kana uka bulela ku yena se Ni mubulelela? U mu bulelele haiba uka lumela, butata bwa mwa mba buka musiya. Uka—uka lumela cwalo? Butata bwa mukokoto wa hao buka kusiya, ni bona, kacwalo wakona ku ikela musipili wa hao mi uka foliswa.

U ikutwa cwani? Wa lumela? [Musali uli, “Eeni, sha.”—Mu.]

¹⁵⁹ Muuna yani yainzi fani ni butata bwani bwa mukokoto, inza ni talima hane Ni bulela cwalo. Wa kona ku foliswa, niyena, haiba uka lumela cwalo, muñaka. Ku lukile, sha.

¹⁶⁰ Musali yainzi bukaufi ni wena, una ni butata bwa mulala, nji cwani, kalibe? Wa lumela kuli Mulimu uka ku folisa? Ubata

kubeya mazoho ku mushimani yomunyinyani bakeñisa mañwele a hae, mi uka ba hande, niyena. Kana wa lumela cwalo? No na ni butata bwa sisali, butata bwa sisali, hau sana bona cwale. Tumelo ya hao i kufolisize ni ku kueza hande.

¹⁶¹ Kana wa lumela ku Jesu Kreste, yena ya swana maabani, kacenu, ni kuyakuile? Konakuli halu beyeni mazoho aluna ku yomuñwi ni yomuñwi ni kulapela tapelo ye ya tumelo, mutu ni mutu wa luna, mu lapele tapelo ya tumelo.

¹⁶² Mulimu yomunde, halunze lu apesizwe mwa Kubateni kwa Bumulimu bwa Hao, ku Ku bona ha uzamaya mwahala sicaba, kufolisa bakuli kai ni kai. Wena u Mulimu. Ni lapela kuli U folise sicaba se kaufela. Tuhela kuli Moya wa Mulimu uwele sincea mwa lipilu zabona, mi tuhela kuli bazibe kuli nako seiya ifela. Lu siyalezi fela nako nyana ya kuba fa, kasamulaho lu kayoba ni Yena Yo lulata. Mi cwale Kubateni kwa Hae kutise foliso ku mutu kaufela.

¹⁶³ Lu halifela Satani, lu halifela likezo za hae kaufela. Ka Libizo la Jesu Kreste, Satani, zwa mwa sicaba.

¹⁶⁴ Kaufela baba Mu lumela cwale, mi mu amuhele foliso ya mina, muyeme ka mautu, muli, “Na yema cwale fa ili ku amuhela foliso yaka. Na i lumela.” Hakuna taba ka buino bwa hao, haiba mwa lumela luli, ha mu yeme. Cwale mu nanule mazoho amina, mi mu bulele kuli, “Ni itumezi, Mulena Jesu, ka kuni folisa.” Mulimu abe ni mina.



PEU YE LYANGANISA LOZ65-0118
(The Seed Of Discrepancy)

Liñusa le ka Muzwale William Marrion Branham, neli kutilizwe lwa pili mwa Sikuwa la Mubulo manzibwana, Sope 18, 1965, ku ba Full Gospel Businessmen's Fellowship International ili kwa Westward Ho Hotel mwa Phoenix, Arizona, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2016 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org